

Ukalata ughwa Paabhuli ku Bhalooma Shiisho shikutangila

Ukalata uyu akasimbighwa nu mutumighwa uPaabhuli. Akasimba ukalata uyu bhwo ali mu kaaya aka Kolinti. Shikulangisha ukuti akasimba ukalata uyu mu chinja icha malongo mahaano, ifyinja fihaano ni chinja chimo (56) bhwo uYeesu aapaapighwa.

UPaabhuli akabhasimbilagha abhiitiki abha mu chiisu icha Looma. Mu bhiiitiki abho bhakabhaamwo aBhayuuta na bhaabho bhataa Bhayuuta.

Inyango iya kusimba ukalata uyu yikabha ya kubhamanyisha abhandu abha mu fyisu fyoshi ukuti bhamwitikaghe nu kumupulika uYeesu Kilisiti. Inyango inine yikabha ya kubhamanyisha abhiitiki muumwo bhakulondighwa uk-wikalila isa abhiitiki abha Yeesu Kilisiti. Soona inyango inine yikabha ya kubhamanyisha abhandu bhooshi ukuti uChaala atakumubhelen-gela umundu ukubha ghwanalooli ku sila iya kushikonga indaghilo isha Moose, loole ku sila iya kumwitika uYeesu Kilisiti kwene.

Ukulamuka ukwa Paabhuli

¹Ukalata uyu akufuma kukwangu une ni Paabhuli, nee indi mubhombi ughwa Kilisiti uYeesu.

UChaala akaanyiitisha nu kuusala ukubha mutumighwa ukuti ifumushange iNongwa iNyiisa ukufuma kwa Chaala.

² INongwa iNyiisa iyo yo yiiyo uChaala akafinga ukufuma kubhwandilo ku sila iya bhasololi* bhaake isa muumwo shisimbiighwe mu Masimbo aMeelu.

³ Inongwa iyo yikumuyugha uMwana ghwake uYeesu Kilisiti yuuyo ku sila iya kupaapighwa ku mubhili, umwene akufuma mu chikolo icha malafyale uNdaabhiti.†

⁴ Umwana uyo ghwe yuuyo uChaala akamushuusha ku sila iya maka agha Mbepo uMwelu. Ku sila iya maka agho, uChaala akamulangisha ukubha Mwana ghwake.‡ Uyo ghwe yuuyo ghwi Malafyale ghwit uYeesu Kilisiti.

⁵ Ukughendela kukwake, uChaala akaambelega ichisa nu kuumbiika ukubha mutumighwa ghwake. Akabhomba ulwo ukuti imbiitishange abhandu bhooshi bhaabho bhataa Bhayuuta, ukuti bhamwitikaghe uMalafyale uYeesu nu kukonga ubhwichane bhwake ukuti ingamu yaake yipaa-lighwange.

⁶ Nuumwe muli mu chibhughutula chimocheene icha bhandu bhala bhaabho uChaala abhiitishiishe ukubha bhandu abha Yeesu Kilisiti.

⁷ Ingubhasimbila ukalata uyu umwe mwe bhiitiki mwe muli mu kaaya aka Looma, mwe

* **1:2 1:2** Bhelenga ishu ilya **Umusololi** ku Mashu aMaheesha.

† **1:3 1:3** Bhelenga ingamu iya **UNdaabhiti** ku Mashu aMaheesha. ‡ **1:4 1:4** **UMwana ghwake** Bhelenga ishu ilya **UMwana ughwa Chaala** ku Mashu aMaheesha.

uChaala abhaghanite nu kubhasala ukubha bhiitiki bhaake. § Ingusuuma ukuti ichisa nu lutengaano ukufuma kwa Taata uChaala na kwa Malafyale ghwitu uYeesu Kilisiti fibhange mu ndumbula shiinyu.

Ukupaalisha ni nyipuuto isha Paabhuli

⁸ Mwe bhiitiki bhanyiitu, ingumupaalisha uChaala ku nongwa yiinyu mweshi ku shiisho uYeesu Kilisiti aashibhombite, paapo ukumwitika kwinyu uYeesu Kilisiti kukuyughighwa na bhandu bhooshi abha mu chiisu chooshi.

⁹ UChaala yuuyo ingumubhombela ku ndumbula yangu yooshi ku sila iya kubhalumbilila abhandu abhanine iNongwa iNyiiisa isha Mwana ghwake, ameenye muumwo ingubhiipuutila amashiku ghooshi.

¹⁰ Ingumusuma uChaala amashiku ghooshi ukuti ku bhwithane bhwake aambe akabhalilo ulu aka kwisa kukwinyu pakubhatesha.

¹¹ Ingunyonywa leka ukubhabhona ukuti imbamanyishe isha fikungilwa ifya Mbepo uMwelu ukuti mukale mu ndumbula shiinyu.

¹² Naayugha amashu agho ukuti umwe pamupeene nuune tukasaniange twibheene-bheene muumwo tukumwitika uYeesu.

¹³ Mwe bhiitiki bhanyiitu, ingulonda manye ukuti ingabhaatika akabhalilo akingi ukwisa pakubhatesha, loole shiliipo shiisho shikushighila ukufika ulu. Ingulonda niise indum-

§ 1:7 1:7 **Abhiitiki bhaake** Bhelenga ishu ilya **Abheelu** ku Mashu aMaheesha.

bilile iNongwa iNyiisa kukwinyu ukuti imbaaghe abhandu abha kumwitika uYeesu isa muumwo ingabhombela ku bhandu abhanine bhaabho bhataa Bhayuuta.

¹⁴ UChaala aambiile imbombo iya kulumbilila iNongwa iNyiisa ku bhandu bhooshi, ku Bhaghiliki na ku bhaabho bhataa Bhaghiliki, ku bhaabho bhamanyiile na ku bhaabho bhatamanyiile.

¹⁵ Yo yiiyo nongwa iyi ishuukitwe leka ukwisa pakulumbilila iNongwa iNyiisa na kukwinyu mwe mukwikala mu chiisu icha Looma.

¹⁶ Une indakufwa isoni ukulumbilila iNongwa iNyiisa paapo ku sila iya nongwa iyo, uChaala akubhapoka abhandu bhooshi bhaabho bhakwitika, ukwandila ku Bhayuuta ukufika ku bhaabho bhataa Bhayuuta.

¹⁷ Paapo iNongwa iNyiisa yikulangisha pabhwelu muumwo uChaala akubhabhelengela abhandu bhaake ukubha bhanalooli pandaashi paapaake. Abhandu bhakubhelengeliha ukubha bhanalooli ku sila iya kwitikaashe isa muumwo shisimbiighwe mu Masimbo aMeelu ukuti, “Umugholofu indiabhange mwumi ku sila iya kuunyiitika.” ☆

UChaala akubhalonga abhandu ku nongwa iya mbiibhi shaabho

¹⁸ UChaala alangishiishe pabhwelu ilyoyo lyake ukufuma kumwanya muumwo indiakabhalonge abhandu bhooshi bhaabho bhatakumwitika na bhaabho ku sila iya mbombo

☆ **1:17 1:17** Habhakuuki 2:4

shaabho imbiibhi, bhakubhashighila abhandu ukubhumanya ubhwanalooli ubhwa Chaala.

¹⁹ UChaala indiakabhalonge abhandu bhooshi abho ku nongwa iya kuti shila shiisho bhaabhaghiile ukushimanya isha Chaala, abhalangishiishe pabhwelu.

²⁰ Paapo kubhwandilo, uChaala akapela utundu twoshi. Po ku sila iyo, abhandu bhabhaghiile ukumanya muumwo uChaala abheeliile nalinga bhatakumubhona. Utundu tuutwo apelite tukulangisha ukuti uChaala ali na maka bhwila na bhwila, soona umwene ghwi Chaala mwene, ataliipo umunine. Yo yiiyo nongwa iyi abhandu bhatabhaghiile ukwitetela ukuti bhatamumeenye uChaala muumwo abheeliile.

²¹ Loole pamupeene nu kuti bhamumeenye uChaala muumwo abheeliile, poope bhatakumu-paala pamu ukumupaalisha isa muumwo shikulondighwa. Abhandu abho bhakwinong'onagha shiisho mbiibhi, soona inyinong'ono shaabho sha bhulema.

²² Abheene bhakwinong'ona ukubha bha mahala, loole ngimba bhalema.

²³ Bhalekite ukumwipuuta uChaala ughwa bhukulumba yuuyo mwumi bhwila na bhwila. Bhatendekeshiishe nu kwanda ukubhiipuuta abhochaala bhaabho bhali ungati bhandu, fikanu, tuyuni pamu fikanu fiifyo fikukwefuka, pamupeene nu kuti bhooshi abho bhakufwa.

²⁴ Ku nongwa iyo, uChaala abhalekite abhandu abho ukuti bhabhombaghe isa muumwo bhiighaniile ukukongana ni finyonywa fyabho ifib-

hiibhi nu kubhombelana bheene-bheene shiisho shikukosha isoni imibhili yaabho.

²⁵ Soona bhabhusanushiishe ubhwanalooli ubhwa Chaala ukubha bhummyashi. Bhakufyipuuta nu kufibhombela ifipelighwa ukukinda ukumwipuuta uMupeli yuuyo ghwa kupaalighwa bhwila na bhwila. Ameni.

²⁶ Ku nongwa iyo, uChaala abhalekite bhabhombaghe shiisho shikukosha isoni isa muumwo bhiiighaniile. Abhakolo bhalekite ukughona na bhaliisha ukukongana na muumwo uChaala akapelela, loole bhaandwile nu kwanda ukughonana bheene-bheene.

²⁷ Bhubhuubhwo, abhaliisha bhoope bhalekite ukughona na bhakolo ukukongana na muumwo uChaala akapelela, loole bhaandwile nu kwanda ukughonana bheene-bheene, imbombo shiisho shikukosha isoni. Ku nongwa iyo, uChaala abhapiile ulufundo luulwo lubhabhaghiile ukukongana nu bhusobhi bhwabho.

²⁸ Ku nongwa iya kuti abhandu abho bhakubhukaana ubhwanalooli ubhwa Chaala, ghwepe uChaala abhalekite bhakongaghe inyinong'ono shaabho imbiibhi. Bhoope bhaandite ukubhomba imbombo shiisho bhatakulondighwa ukushibhomba.

²⁹ Abhandu abho bhali nu bhubhiibhi ubhwingi ubhwa luko nu luko isa ubhunyal, ifinyonywa ifibhiibhi, bhali nu lwibhuno, bhaghoghi, bhakwighana ukulwa, ukuyugha bhummyashi, ukulughulania abhandu nu kuyebha.

³⁰ Abhandu abho bhasongeleshi, bhandu bhaabho bhamubhengite uChaala, bhatakub-

hasaaghila abhanine, soona bhandu bha matingo na miifuno. Kooshi akabhalilo bhakutungu isila imbya iya kubhomba imbiibhi, bhatakubhaghindika abhapaapi bhaabho.

³¹ Soona bhalema, bhatakubhomba shiisho bhakufinga, bhandu bhaabho bhatali ni chisa soona bhakali.

³² Pamupeene nu kuti bhabhumeenye ubhulongi ubhwa nalooli ubhwa Chaala ukuti abhandu bhaabho bhakubhomba imbiibhi isa isho indiakahalonge nu kubhapyuta, poope bhakwendelela ukushibhomba imbiibhi isho nu kubhapaala abhanine bhaabho bhakubhomba imbiibhi isa isho.

2

UChaala indiakahalonge abhandu bhooshi chishita kusala

¹ Po linga kumulonga umunyiinyu ku mbiibhi shiisho akushibhomba, umanye ukuti kwilonga yughweghwe paapo imbiibhi shiisho akushibhomba umwene sho shiisho nuughwe kushibhomba. Ku sila iyo, utabhaghiile ukwitetela naalimo pandaashi pa Chaala.

² Tweshi tumeenye ukuti uChaala akubhalonga mu bhwanalooli abhandu bhooshi bhaabho bhakubhomba imbiibhi isa isho.

³ Ughwe ghwe kubhalonga abhandu bhaabho bhakubhomba imbiibhi shiisho nuughwe kushibhomba, kali, kwinong'ona ukuti indiukapone ku bhulongi ubhwa Chaala?

⁴ Kali, kuchifuuya ichisa chaake ichingi nu bhukifu bhwake? Kali, utakumanya ukuti uChaala akukupelela ichisa ku nongwa iya

kuti akulonda upinduke nu kwilaata imbiibhi shaako?

⁵ Loole ku nongwa iya kuti indumbula yaako ngafu, soona utakulonda ukwilaata imbiibhi shaako, kwibhiikila yughweghwe ulufundo ulukulu pi ishiku liilyo uChaala indiakalangishe ilyoyo lyake nu kubhalonga abhandu bhooshi mu bhwanalooli.

⁶ Pi ishiku ilyo, uChaala indiakamuhombe ghweshi umundu ukukongana ni mbombo shaake.☆

⁷ UChaala indiakabhape ubhwumi ubhwa bhwila na bhwila abhandu bhala bhaabho bhakwikaakila ukubhomba inyiisa ku nongwa iya kuti bhakulonda ukupokeela ubhukulumba, ulughindiko nu bhwumi bhuubhwo bhutakukomanika naalumo.

⁸ Loole indiakabhakalalile nu kubhapa ulufundo ulukulu abhandu bhala bhaabho bhapafu, bhaabho bhakubhukaana ubhwanalooli, soona bhakubhomba imbiibhi.

⁹ Ghweshi umundu yuuyo akubhomba imbiibhi, indiakashaaghe indamyo nu bhubhafu ubhukali, ukwandila ku Bhayuuta ukufika ku bhaabho bhataa Bhayuuta.

¹⁰ Loole umundu ghweshi yuuyo akubhomba inyiisa, uChaala indiakamupe ubhukulumba, ulughindiko nu lutengaano, ukwandila ku Bhayuuta ukufika ku bhaabho bhataa Bhayuuta.

¹¹ Paapo uChaala atakubhabhombela akiisa abhandu bhamu ukukinda abhanine.

¹² Abhandu bhooshi bhaabho bhakubhomba imbiibhi chishita kushimanya indaghilo isha

Moose,* uChaala indiakabhalonge chishita kubhombela indaghilo isho. Loole abhandu bhala bhaabho bhakubhomba imbiibhi bhwo bhashimeenye indaghilo isha Moose, uChaala indiakabhalonge ukukongana ni ndaghilo isho.

¹³ Paapo uChaala atakumubhelengela umundu ukubha ghwanalooli ku nongwa iya kushipulikaashe indaghilo, loole akumubhelengela umundu ukubha ghwanalooli ku nongwa iya kushibhombela imbombo indaghilo isho.

¹⁴ Abhandu bhaabho bhataa Bhayuuta bhatali ni ndaghilo isha Moose. Loole linga bhakubhomba ukukongana nu tuyiilo twabho isa mumwo indaghilo shikulondela, kwo kuti bhoope bhashimeenye indaghilo mu ndumbula shaabho pamupeene nu kuti bhatali ni ndaghilo.

¹⁵ Utuyiilo twabho tukulangisha ukuti uChaala asimbite indaghilo mu ndumbula shaabho. Soona ni nyinong'ono shaabho shoope shikushimikisha isho ukuti sha nalooli paapo akabhalilo kamu shikubhasitaakagha na kabhalilo akanine shikubhiimilagha.

¹⁶ Ishi indishikabhe ulwo pi ishiku liilyo uChaala indiakashilonge inyinong'ono isha bhandu isha kubhutiitu ku sila iya Kilisiti uYeesu. INongwa iNyiisa yiiyo ingulumbilila kukwinyu yikulingaania isho.

Abhayuuta ni ndaghilo isha Moose

¹⁷ Po ughwe ghwe kwiugha ukuti ghwe Muyuuta, kusubhaalila indaghilo, soona kwifuna ukuti ghwe mundu ghwa Chaala nalooli,

* **2:12 2:12** Bhelenga ingamu iya **UMoose** ku Mashu aMaheesha.

18 kwibhona ukuti ushimeenye shiisho uChaala akulonda na shiisho shibhaghiile pandaashi pa-paake ku nongwa iya kuti umanyiile indaghilo shaake.

19 Ughwe kwibhona ukuti ghwe mulongoshi ughwa bhandu bhaabho bhataa Bhayuuta isa umundu yuuyo akubhalongosha abhafwamaaso pamu ukuti uli isa inyaale yiiyo yikubhabhalila abhandu bhaabho bhali mu chiisi.

20 Soona kwibhona ukuti ghwe mumanyishi ughwa bhandu bhaabho bhatakushaaghania na bhaabho bhakaali ukubhumanya ubhwanalooli ubhwa Chaala isa abhaana abhakeke paapo kwibhona ukuti uli na mahala soona ushimeenye indaghilo isha Moose.

21 Ughwe kubhamanyishanga abhandu abhaine, kali, kooni utakwimanyisha yughweghwe? Ughwe kulumbililagha ku bhandu ukuti, “Manye mwibhaghe,” kali, kooni ughwe kwibha?

22 Ughwe kubhabhuulagha abhandu ukuti, “Manye mushipanaghe,” kali, kooni ughwe ku-shipana? Soona, kali, kooni kubhakalalila bhaabho bhakwipuuta ku bhochaala bhwo yughweghwe kwibha utundu ukufuma mu nyumba isha bhochaala abho?

23 Ughwe kwifuna ukuti ushimeenye indaghilo isha Chaala, kali, kooni kumukosha isoni uChaala ku sila iya kushikomania indaghilo shaake?

24 Po ishi shili isa muumwo shisimbiighwe mu Masimbo aMeelu ukuti, “Abhandu abha fyisu ifinine, bhakuyifuyula ingamu iya Chaala ku

nongwa iya mbombo shiinyu imbiibhi.”☆

25 Ukukwesulighwa† kukumwafwashe umundu linga akushibhombela imbombo indaghilo isha Chaala. Loole linga atakushibhombela imbombo indaghilo isha Chaala, ukukwesulighwa ukwo kutakumwafwa naakamu umundu uyo, ghwepe akughelela nu mundu yuuyo atakwesuliighwe.

26 Po linga umundu yuuyo atakwesuliighwe akushibhombela imbombo indaghilo isha Chaala, kali, uChaala atakumwitika ukubha mundu ghwake isa yula yuuyo akwesuliighwe?

27 Po umundu yuuyo atakwesuliighwe loole akushibhombela imbombo indaghilo isha Chaala, indiakamuhobhoshe uChaala ukukinda umwe mwe Bhayuuta. Inguyugha ulwo ku nongwa iya kuti umwe mukwesuliighwe soona mushimeenye indaghilo shiisho shili mu masimbo, loole mutakushibhombela imbombo.

28 Paapo umundu ataa Muyuuta ghwa nalooli ku nongwa iya kukonga inyiiho isha Bhayuuta pamu ku nongwa iya kukwesulighwa umubhili.

29 Loole uMuyuuta ughwa nalooli ghwe yula yuuyo akumughindika uChaala mu ndumbula yaake. Soona ukukwesulighwa ukwa nalooli kwo kukwesulighwa indumbula kuukwo kukubhombighwa nu Mbepo uMwelu. Umundu isa uyo atakupokeela imbaalo ukufuma ku bhandu, loole akupokeela ukufuma kwa Chaala.

☆ 2:24 2:24 Yesaaya 52:5; Esekiyeeli 36:20, 22 † 2:25 2:25
Bhelenga ishu ilya **Ukukwesulighwa** ku Mashu aMaheesha.

3

UChaala musubhaalilighwa akabhalilo kooshi

¹ Kali, ukubha Muyuuta kukwafwa kooni?
Pamu kali, ukukwesulighwa kukwafwa kooni?

² Ukubha Muyuuta kukwafwa leka mu sila inyingi. Isila yimo ya kuti uChaala akabhapa aBhayuuta amashu ghaake.

³ Kali, tuyughe kooni? Linga aBhayuuta bhamu bhatakabha bhasubhaalilighwa ku shi-
isho bhakafinga, kali, ilyo likulangisha ukuti
ghwepe uChaala ataaakabhe musubhaalilighwa
ukubhomba shila shiisho akafinga?

⁴ Nashiku! Pamupeene nu kuti abhandu
bhooshi bhamyashi, poope umwene uChaala
musubhaalilighwa akabhalilo kooshi, isa
mumwo shisimbiighwe mu Masimbo aMeelu
ukuti,

“Linga kuyugha,
amashu ghaako gha nalooli.

Linga kulonga,
ubhulongi bhwako bhwa nalooli.”[☆]

⁵ Loole injughe ishi ungate munduushe. Linga
imbiibhi shiitu shikulangisha ukuti uChaala
akubhomba ubhwanalooli, kali, tuyughe kooni?
Kali, tuyughe ukuti uChaala atakubhomba ubh-
wanalooli linga akutulonga?

⁶ Nashiku! Linga uChaala ataa ghwanalooli,
kali, abhaghiile bhuleele ukubhalonga abhandu
abha mu chiisu ichi?

⁷ Soona, umundu abhaghiile ukuyugha ukuti,
“Linga ubhumyashi bhwangu bhukulangisha

[☆] 3:4 3:4 Sabhuli 51:4

pabhwelu ubhusubhaalilighwa ubhwa Chaala na bhandu bhakwongela ukumupaala, po kali, kooni ingulongighwa ukubha mutulanongwa?"

⁸ Ukuyugha ulwo kugheliile nu kuyugha ukuti, "Tubhombaghe imbiibhi ukuti shibhoneke inyiisa!" Abhandu bhamu bhakutupiikila bhakuti nuutwe tukumanyisha isa bhubhuubhwo. UChaala indiakabhalonge abhandu abho ukukongana nu bhusobhi bhwabho.

Ataliipo umundu yuuyo akubhomba shiisho shibhaghiile pandaashi pa Chaala

⁹ Kali, tuyughe kooni ulu? Kali, tuyughe ukuti twe Bhayuuta twe bhabhaghile ngaani pandaashi pa Chaala ukukinda abhandu bhaabho bhataa Bhayuuta? Nashiku! Tutabhaghiile ukuyugha ulwo paapo naabhabhuula ukuti aBhayuuta na bhaabho bhataa Bhayuuta bhooshi bhakulongoshighwa ni mbiibhi.

¹⁰ Isho shili isa muumwo shisimbiighwe mu Masimbo aMeelu ukuti,

"Ataliipo umundu naayumo yuuyo mubhaghile pandaashi pa Chaala,
ataliipo naayumo.

¹¹ Ataliipo umundu naayumo yuuyo amumeenye uChaala,
soona ataliipo naayumo yuuyo akumulonda.

¹² Abhandu bhooshi bhalekite ukumwitika uChaala,
bhooshi bhakomanikite soona bhatali ni mbombo naayimo pandaashi papaake.

Ataliipo naayumo yuuyo akubhomba inyiisa."✧

- 13 “Amamilo ghaabho ghali ungati mapumba ghaagho ghali bhwashu. Indimi shaabho shikuyugha ubhummyashi.”✧
 “Imilomu yaabho yikuyugha amashu ghaagho ghali ni salile isa isha njoka.”✧
- 14 “Imilomu yaabho yikuyughagha ifighune na mashu amakali.”✧
- 15 “Utulundi twabho tukukinda lubhilo ukubhuuka pakukupula ibhanda.
- 16 Pooshi paapo bhakubhuukagha, bhakubhafulasha abhandu nu kubhapelela indamyo.
- 17 Abheene bhatameenye ukwikala ku lutengaano na bhandu abhanine.”✧
- 18 “Bhatakumwohopa uChaala na kaakanandi.”✧
- 19 Po tumeenye ukuti shooshi shiisho shili mu ndaghilo isha Moose, shisimbiighwe ku bhandu bhala bhaabho bhakulongoshighwa ni ndaghilo isho. Paapo shikasimbighwa ukuti linga uChaala akuya pakulonga ichiisu, abhandu abho manye bhakabhange ni lya kwitetela, soona shikulangisha ukuti uChaala indiakabhalonge abhandu bhooshi abha mu chiisu.
- 20 Po ataliipo umundu naayumo yuuyo uChaala akumubhelengela ukubha ghwanalooli pandaashi papaake ku sila iya kushikonga indaghilo. Paapo imbombo iya ndaghilo ya kumulangishaashe umundu ukuti mubhomba mbiibhi.

✧ 3:13 3:13 Sabhuli 5:9 ✧ 3:13 3:13 Sabhuli 140:3 ✧ 3:14 3:14 Sabhuli 10:7 ✧ 3:17 3:15-17 Yesaaya 59:7-8 ✧ 3:18 3:18 Sabhuli 36:1

UChaala akumubhelengela umundu ukubha ghwanalooli ku sila iya kumwitika uYeesu

²¹ Loole ulu uChaala atulangishiishe isila yaake muumwo akubhabhelengela abhandu ukubha bhanalooli chishita kusubhaalila indaghilo isha Moose. Shoope indaghilo isha Moose na masimbo agha bhasololi fibhiikite pabhwelu shooshi isho.

²² UChaala akubhabhelengela abhandu bhooshi ukubha bhanalooli ku sila iya kumwitika uYeesu Kilisiti. Akabhomba ulwo ku bhandu bhooshi chishita kusala.

²³ Paapo abhandu bhooshi bhabhombite imbi-ibhi nu kubha kubhutali nu bhukulumba ubhwa Chaala.

²⁴ Loole ku chisa chaake, uChaala abhabhelengiile abhandu ukubha bhanalooli pabhuubhu ku sila iya kumutuma Kilisiti uYeesu yuuyo akatupoka ukufuma ku mbiibhi.

²⁵ UChaala akamufumya uYeesu Kilisiti ukuti abhe chabhupe icha kubhafwania abhandu naghwe ku sila iya kukupula ibhanda lyake, ukuti bhaabho bhakumwitika abhahobhokele imbiibhi shaabho. Akabhomba ulwo ukulangisha ukuti umwene ghwanalooli paapo akak-ibha ku sila iya kushita kubhafunda abhandu ku mbiibhi shaabho shiisho bhakashibhombagha kubhwandilo.

²⁶ Soona akabhomba ulwo ukulangisha ukuti umwene musubhaalilighwa akabhalilo aka, nu kuti ghwe yuuyo akubhabhelengela ukubha bhanalooli abhandu bhooshi bhaabho bhakumwitika uYeesu.

²⁷ Ku nongwa iyo, kali, umundu abhaghiile ukwifuna? Nashiku atabhaghiile na kaakanandi! Kali, umundu abhaghiile ukubhelengighwa ukubha ghwanalooli ku sila iya kukonga indaghilo isha Moose? Nashiku! Umundu akubhelengighwa ukubha ghwanalooli ku sila iya kumwitika uYeesu kwene.

²⁸ Paapo tumeenye ukuti uChaala atakumubhelengela umundu ukubha ghwanalooli ku sila iya kukonga indaghilo, loole ku sila iya kumwitika uYeesu.

²⁹ Kali, uChaala ghwi Chaala ughwa Bhayuuta bheeneshe pamu ghwi Chaala ghwa na bhaabho bhataa Bhayuuta? Nalooli, umwene ghwi Chaala ughwa Bhayuuta na bhaabho bhataa Bhayuuta.

³⁰ Ku nongwa iya kuti uChaala ali yu-moywene, umwene akubhabhelengela aBhayuuta pamupeene na bhandu abhanine bhaabho bhataa Bhayuuta ukubha bhanalooli ku sila iya kumwitika uYeesu.

³¹ Po linga tukukasha ukwitika, kali, kwo kuti indaghilo shitali ni mbombo naayimo? Nashiku, indaghilo shili ni mbombo! Paapo linga tukukasha ukumwitika uYeesu, tukushimikisha ukuti indaghilo shili ni mbombo.

4

UAbhulahamu akubhelengighwa ukubha ghwanalooli ku sila iya kwitika

¹ Po ukukongana ni nongwa isho isha Chaala ukumubhelengela umundu ukubha ghwanalooli,

kali, tuyughe bhuleele ku sha sekulu ghwitu uAbhulahamu?*

² Linga uAbhulahamu akabhelengeli ghwanga ukubha ghwanalooli ku nongwa iya mbombo shaake inyiisa, po ngali ali nako aka kwifunila mundaashi mu bhandu, loole pooma pandaashi pa Chaala.

³ Paapo shisimbiighwe mu Masimbo aMeelu ukuti, “Ku nongwa iya kwitika kwake uAbhulahamu, uChaala akamubhelengela ukubha ghwanalooli.”☆

⁴ Umundu yuuyo akubhomba imbombo, umufwalo ghwake ghutakubhelengeli ghwa ukubha lusekelesho, loole akuhombighwa ukukongana ni mbombo yaake.

⁵ Loole umundu yuuyo atakusubhaalila imbombo shaake mwene, loole akumwitika uChaala yuuyo akubhahobhokela abhabhomba mbiibhi, uChaala akumubhelengela ukubha ghwanalooli ku nongwa iya lwitiko lwake.

⁶ Inongwa ishi shili isa muumwo ghwepe umalafyale uNdaabhiti akayugha isha lusekelo ulwa mundu yuuyo uChaala akumubhelengela ukubha ghwanalooli chishita kusaaghila imbombo shaake akati,

⁷ “Bhasayighwa abhandu bhaabho uChaala abhahobhokiile imbiibhi shaabho shooshi nu kushitiisha lwoshi.

⁸ Musayighwa umundu yuuyo uMalafyale uChaala atakumubhelengela soona

* **4:1 4:1** Bhelenga ingamu iya **UAbhulahamu** ku Mashu aMaheesha. ☆ **4:3 4:3** Bhwandilo 15:6

ukuti ali ni mbiibhi.”☆

9 Ukukongana na shiisho uNdaabhiti ayughite, kali, tubhaghiile ukuyugha ukuti uChaala akubhasaya aBhayuuta bheene, pamu akubhasaya na bhaabho bhataa Bhayuuta? Ingubhakumbusha ukuti shisimbiighwe mu Masimbo aMeelu ukuti, “Ku nongwa iya kwitika kwake uAbhulahamu, uChaala akamubhelengela ukubha ghwanalooli.”☆

10 Kali, uChaala akamubhelengela uAbhulahamu ukubha ghwanalooli bhwo akwesuliighwe pamu bhwo akaali ukukwesulighwa? Ubhwanalooli bhwa kuti uChaala akamubhelengela uAbhulahamu ukubha ghwanalooli bhwo akaali ukukwesulighwa.

11 Ukukwesulighwa ukwo kukabha chilangisho chiicho chikashimikishanga ukuti uChaala akamubhelengela uAbhulahamu ukubha ghwanalooli ku nongwa iya kwitika kwake bhwo akaali ukukwesulighwa. Ku sila iyo, uAbhulahamu akabhiikighwa ukubha ghwi taata ughwa bhandu bhooshi bhaabho bhakumwitika uChaala nu kubhelengeliighwa ukubha bhanalooli pamupeene nu kuti bhatakwesuliighwe.

12 Bhubhuubhwo, uAbhulahamu ataa ghwi taata ughwa bhaabho bhakwesuliighweshe, loole bhaabho bhakwesuliighwe nu kumwitika uChaala isa muumwo ghwepe akamwitikagha uChaala bhwo akaali ukukwesulighwa.

UChaala akubhiika ulufingo nu Abhulahamu

☆ 4:8 4:7-8 Sabhuli 32:1-2

☆ 4:9 4:9 Bhwandilo 15:6

13 UChaala akafinga kwa Abhulahamu pamupeene ni chikolo chaake ukubhapa ichiisu chooshi chibhe chaabho. Atakabhomba ulwo ku nongwa iya kuti uAbhulahamu akashikongagha indaghilo, loole ku nongwa iya kwitika kwake, uChaala akamubhelengela ukubha ghwanalooli.

14 Linga uChaala akafingagha kwa Abhulahamu ni chikolo chaake ku nongwa iya kukonga indaghilo, po ukumwitika uChaala ngali kutali ni mbombo naayimo. Soona, ulufingo ulwa Chaala ngali lwa bhumyashi.

15 Paapo umundu yuuyo atakushikonga indaghilo, akufundighwa nu Chaala. Loole linga indaghilo shitaliipo, po ataliipo umundu naayumo ughwa kufundighwa nu Chaala ku nongwa iya kushita kukonga indaghilo.

16 Ku nongwa iyo, ulufingo ulwa Chaala ulwo lukwisa ku sila iya kumwitika nu kusubhaalila ichisa chaake. Ulufingo ulwo lutali ku bhala bheene bhaabho bhakapeelighwa indaghilo, loole na ku bhala bhaabho bhakumwitika uChaala isa uAbhulahamu. UAbhulahamu ghwe yuuyo ghwi taata ghwitu tweshi.

17 Isho shili isa muumwo shisimbiighwe mu Masimbo aMeelu ukuti, “Naakubhiika ukubha ghwe taata ughwa fyisu ifyingi.”✧ UChaala akabhiika ulufingo ulu kwa Abhulahamu ku nongwa iya kuti akamwitikagha uChaala yuuyo akubhashuusha abhafwe nu kushibhiika shiisho shitakabhaapo ukuti shibheepo ulu.

18 Pamupeene nu kuti shitakabha mbepe kwa Abhulahamu, poope akeendelela ukwitika nu

✧ 4:17 4:17 Bhwandilo 17:5

kusubhaalila, akabha ghwi ghwise ughwa fy-isu ifyingi isa muumwo uChaala akamubhuula akati, “Abhandu abha chikolo chaako indibhak-abhe bhangi isa indoondwa.”✧

19 Akabhalilo ako uAbhulahamu akabha aapalamila ukufikisha ifyinja imya yimo (100). Pamupeene nu kuti akamanya ukuti umubhili ghwake ghukabha ungati ghufwile, soona nu Saala umukashi akabha mughumba, poope akeendelela ukwitika ukuti uChaala indiabhombe isa muumwo akafinga.

20 Po uAbhulahamu atakiilaamwanga naakamu ku shiisho uChaala akafinga, loole akeendelelagma ukumwitika ku maka nu kumupaala,

21 paapo akamanya ukuti uChaala ali na maka agha kushibhomba shiisho akafinga.

22 Iyi yo yiiyo nongwa shisimbiighwe mu Masimbo aMeelu ukuti, “UChaala akamubhelengela ukubha ghwanalooli.”✧

23 Amashu agha ghaagho ghasimbiighwe ukuti, “UChaala akamubhelengela ukubha ghwanalooli,” ghatakasimbighwa ku nongwa iya Abhulahamu mwene,

24 loole ghakasimbighwa na ku nongwa yiiitu twe uChaala akutubhelengela ukubha bhanalooli ku sila iya kumwitika umwene yuuyo akamushuusha uMalafyale ghwitu uYeesu.

25 UChaala akamufumya uYeesu ukuti aghoghighwe ku nongwa iya mbiibhi shiitu, soona akamushuusha ukuti uChaala

atubhelengele ukubha bhanalooli.

5

UKilisiti akutufwania nu Chaala

¹ Po ku nongwa iya kuti uChaala atubhelengiile ukubha bhanalooli ku sila iya kumwitika, tuli nu lutengaano naghwe ku sila iya Malafyale ghwitu uYeesu Kilisiti.

² Ku sila iya kumwitika kwitu ukwo, tupokeelite ichisa icha Chaala chiicho chili pamupeene nuutwe. Soona tuli nu lusekelo leka paapo tuli nu lusuubhilo ukuti inditukabhe pamupeene nu Chaala mu bhukulumba bhwake.

³ Soona nalinga tukushaagha indamyo, utwe tukwendelela ukusekela paapo tumeenye ukuti indamyo shikutumanyisha ukuti twendelelaghe ukukibha.

⁴ Ukukibha kukupela ubhukifu ubhwa ndumbula, bhwope ubhukifu ubhwa ndumbula bhukupela ulusuubhilo.

⁵ Ulusuubhilo ulwo lutabhangiile ukutukosha isoni paapo uChaala atupiile ulughano lwake mu ndumbula shiitu ku sila iya Mbepo uMwelu yuuyo atupiile.

⁶ Tesha, paapo bhwo tutali nu ghwa kutwafwa, uKilisiti akiisa nu kufwa ku nongwa iya mbiibhi shiitu mu kabhalilo kaako uChaala akabhaatika.

⁷ Paapo pakafu leka umundu ukwifumya ukufwa ku nongwa iya mundu umugholofu. Loole pamu umundu abhangiile ukughela ukwifumya ukufwa ku nongwa iya mundu yuuyo akubhomba inyiisa ku bhandu.

⁸ Loole uChaala akalangisha ulughano lwake kukwitu ku sila iya kumufumya uKilisiti, ukuti afwe ku nongwa yiitu bhwo tukaali twe bhabhomba mbiibhi.

⁹ Ku nongwa iya kuti uChaala atubhelengiile ukubha bhanalooli ku sila iya libhanda ilya Kilisiti, nalooli uYeesu indiakatupoke ukufuma ku lyoyo ikali ilya Chaala.

¹⁰ Paapo bhwo tukaali twe bhalughu bhaake, uChaala akatufwania utwe naghwe ku sila iya bhufwe ubhwa Mwana ghwake. Po tuli nu bhwanalooli ukuti uKilisiti indiakatupoke ku nongwa iya kuti umwene mwumi.

¹¹ Soona ukwongelaapo pa isho, tukuhobhoka leka ku nongwa iya shiisho uChaala atubhombiile ku sila iya Malafyale ghwitu uYeesu Kilisiti yuuyo akatufwania pamupeene naghwe.

Muumwo uAatamu ali pashima nu Yeesu

¹² Ku sila iya mundu yumoywene, imbiibhi yikiingila mu chiisu. Ku nongwa iya mbiibhi iyo, ubhufwe bhukiingila mu chiisu. Yo yiyo nongwa iyi abhandu bhooshi bhakufwa paapo bhabhombite imbiibhi.

¹³ Paapo ukufuma muumwo uAatamu akabhomba imbiibhi ukufika paapo uMoose akapo-keelagha indaghilo, imbiibhi shikabha shiliimwo mu chiisu. Loole uChaala atakabhahelengela abhandu ukuti bhakukomania indaghilo ku nongwa iya kuti indaghilo shitakabhaapo.

¹⁴ Loole ukufuma akabhalilo aka Aatamu ukufika akabhalilo aka Moose ubhufwe bhukalon-goshanga na ku bhala bhaabho bhatakabhom-

bagha imbiibhi isa yila yiiyo uAatamu akayibhomba.

UAatamu akabha chifwanikisho icha Kilisiti yuuyo akiisagha mundaashi.

¹⁵ Loole imbiibhi iya Aatamu yila yitabhaghiile ukughelela ni chisa icha Chaala. Paapo imbiibhi iya mundu yumoywene, uAatamu, yikapela ukuti abhandu abhingi bhafwange. Loole ku nongwa iya chisa ichikulu icha Chaala ukughendela ku mundu yumoywene, uYeesu Kilisiti, abhandu abhingi bhakuhobhokelighwa imbiibhi shaabho.

¹⁶ Ichisa icha Chaala chili pashima ni mbiibhi iya Aatamu. Bhwo umundu yumoywene aabhomba imbiibhi, uChaala akabhalonga abhandu ku sila iya kubhafunda, loole bhwo abhandu abhingi bhaabhomba imbiibhi, uChaala akalangisha ichisa chaake ku sila iya kubhahobhokela nu kubhabhelengela ukubha bhanalooli.

¹⁷ Ku nongwa iya mbiibhi iya mundu yumoywene, uAatamu, ubhufwe bhukaanda ukubhalongosha abhandu bhooshi. Loole abhandu bhooshi bhaabho bhakupokeela ichisa ichishita chipimilo ukufuma kwa Chaala nu kubhelen-gelighwa ukubha bhanalooli, indibhakabhe na maka agha kupoota mu bhwumi bhwabho ku nongwa iya mbombo isha mundu yumoywene, uYeesu Kilisiti.

¹⁸ Soona, isa muumwo abhandu bhooshi bhakalongighwa ku nongwa iya mbiibhi yimoyeene, bhuhubhwo abhandu bhooshi bhakubhelen-gelighwa ukubha bhagholofu nu kubhwagha ubhwumi ubhwa bhwila na bhwila ku nongwa

iya mbombo inyiisa yimoyeene.

¹⁹ Isa muumwo umundu yumoywene yuuyo atakamupulika uChaala akapela ukuti abhandu abhingi bhabhe bhatulanongwa, bhuhhuubhwo umundu yumoywene yuuyo akamupulikagha uChaala, apelite ukuti uChaala abhabhelengele abhandu abhingi ukubha bhanalooli.

²⁰ UChaala akamupa uMoose indaghilo shaake ukuti abhandu bhiiyaaghaniange ukuti bhakubhomba imbiibhi inyingi. Loole bhwo abhandu bhoongela ukubhomba imbiibhi, uChaala akoongela ukulangisha ichisa ichingi ku bhandu bhaake.

²¹ Isa muumwo imbiibhi shikabha na maka agha kubhalongosha abhandu nu kubhapelela ubhufwe, bhuhhuubhwo ku sila iya Chaala ukubhabhelengela abhandu ukubha bhanalooli, ichisa chaake chikubhalongosha abhandu ukufika ku bhwumi ubhwa bhwila na bhwila ukughendela kwa Malafyale ghwitu uYeesu Kilisiti.

6

Ukufwa nu kushuuka pamupeene nu Kilisiti

¹ Kali, tuyughe kooni? Kali, twendelelaghe ukubhomba imbiibhi ukuti uChaala oongelaghe ukutupelela ichisa?

² Nashiku! Utwe twabhuliighwe ukufuma ku mbiibhi ungati mundu yuuyo afwile yuuyo atabhaghiile ukubhomba naakamu. Kali, tubhaghiile bhuleele ukwendelela ukubhomba imbiibhi?

³ Kali, mutameenye ukuti bhwo twoshighwa, tukabha pamupeene nu Kilisiti uYeesu na mu bhufwe bhwake?

4 Po bhwo twoshighwa, tukabha ungati tukafwa nu kushiilighwa pamupeene naghwe ukuti isa muumwo uTaata uChaala akamushuusha uKilisiti ku maka ghaake amakulu, bhuhubhwo uTaata uChaala akatushuusha nuutwe ukuti tubhe nu bhwumi ubhupya.

5 Isa muumwo tukabha ungati tukafwa pamupeene nu Kilisiti ku sila iya kwoshighwa kwitu, bhuhubhwo uChaala indiakatushuushe isa muumwo akamushuusha uKilisiti.

6 Tumeenye ukuti bhwo uKilisiti aaghoghghwa pa chikobhekano, ubhundu bhwitutu ubhwa bhwandilo bhukabha ungati bhukaghoghghwa pamupeene naghwe ukuti ubhundu ubhwa mbiibhi bhupyutighwe, nuutwe manye twendelelaghe ukubha bhatumwa abha mbiibhi soona.

7 Paapo linga umundu aafwa pamupeene nu Kilisiti, akubha mwabhuke ukufuma ku maka agha mbiibhi.

8 Po linga tukafwa pamupeene nu Kilisiti ku sila iya kwoshighwa kwitu, bhuhubhwo tukwitika ukuti inditukiikalaghe pamupeene naghwe.

9 Paapo tumeenye ukuti uChaala akamushuusha uKilisiti nu kuti ataaakafwe soona paapo ubhufwe bhutali na maka kukwake soona.

10 UKilisiti akafwa limolyeneeshe ku nongwa iya mbiibhi isha bhandu bhooshi nu kushipoota. Loole akabhalilo aka mwumi, akumuhobhoshu uChaala.

11 Bhuhubhwo nuumwe mwibhone ukuti mwabhuliighwe ukufuma ku mbiibhi ungati bhafwe bhaabho bhatabhaghiile ukubhomba

naakamu, soona uChaala abhapelite ukubha bhuumi ku sila iya kubha pamupeene nu Kilisiti uYeesu.

¹² Po manye mushiitikishange imbiibhi ukulongosha soona imibhili yiinyu yiyo yikufwa nu kufikonga ifinyonywa ifibhiibhi ifya mibhili yiinyu.

¹³ Soona manye mufumyange utumbakaasha utwa mibhili yiinyu ukuti tubhombaghe imbiibhi, loole ifumyanga kwa Chaala isa abhandu bhaabho bhaafwile, loole ulu uChaala abhashushishe. Fumyanga utumbakaasha utwa mibhili yiinyu ukuti tubhombaghe shiisho nyiisa.

¹⁴ Paapo mutaamulongoshighwange ni mbiibhi soona ku nongwa iya kuti mutakulongoshighwa ni ndaghilo, loole mukulongoshighwa ni chisa icha Chaala.

Abhatumwa abha mbiibhi na bhatumwa abha Chaala

¹⁵ Kali, tuyughe kooni? Kali, twendelelaghe ukubhomba imbiibhi ku nongwa iya kuti tutakulongoshighwa ni ndaghilo, loole tukulongoshighwa ni chisa icha Chaala? Nashiku! Manye tubhombaghe ulwo.

¹⁶ Kali, mutameenye ukuti linga mukwifumya ku mundu nu kubhomba isa muumwo akulondela, mukubha bhatumwa bhaake? Linga mukwifumya ukubhomba imbiibhi mukubha bhatumwa abha mbiibhi, po ubhumalilo bhwake bhufwe. Loole linga mukwifumya ukumupulika uChaala mukubha bhatumwa abha nyiisa, po ubhumalilo bhwake indiakabhabelengele ukubha bhanalooli.

¹⁷ Loole ingumupaalisha uChaala paapo kubhwandilo mukabha bhatumwa abha mbiibhi, loole ulu mufyitikite ifimanyisho fyoshi ififyo mukafipokeela nu kufikonga ku ndumbula yooshi.

¹⁸ UChaala akabhaabhula umwe ukuti manye mubhe bhatumwa abha mbiibhi nu kubhabhiika mubhe bhatumwa bhaake ukuti mubhombaghe shiisho shibhaghiile pandaashi papaake.

¹⁹ Ingubhombela ichifwanikisho icha bhatumwa ku nongwa iya kuti ubhundu bhwynyu bhukubhashighila ukuyaaghania inongwa iyo. Isa muumwo mukiifumyanga utumbakaasha utwa mibhili yiinyu ukubhomba imbiibhi nu bhunyali, bhubhuubhwo ulu ifumyanga utumbakaasha utwa mibhili yiinyu ukuti tubhombaghe shiisho shibhaghiile pandaashi pa Chaala.

²⁰ Akabhalilo kaako mukabha bhatumwa abha mbiibhi, mukabha bhaabhuke ukushita kubhomba inyiisa.

²¹ Kali, mukakabha kooni ku shila shiisho mukashibhombagha shiisho ulu mukushifwila isoni? Ukwendelela ukubhomba isho, ubhumalilo bhwake bhufwe.

²² Loole ulu ku nongwa iya kuti uChaala abhaabhwile umwe ukufuma ku maka agha mbiibhi nu kubhabhiika ukubha bhatumwa bhaake, abheelufyishe, po ubhumalilo bhwake indimukapokeele ubhwumi ubhwa bhwila na bhwila.

²³ Paapo umufwalo ughwa mundu yuuyo akubhomba imbiibhi, bhufwe, loole ulusekelesho luulwo uChaala akalufumya pabhuubhu, bhwumi ubhwa bhwila na bhwila ukughendela

kwa Malafyale ghwitu uKilisiti uYeesu.

7

Tutakulongoshighwa soona ni ndaghilo isha Moose

¹ Mwe bhiitiki bhanyiitu, inguya pakuyugha ishi paapo ingyugha na bhandu bhaabho bhashimeenye indaghilo. Kali, mutameenye ukuti indaghilo shikumulongoshaashe umundu bhwo mwumiishe?

² Ishi shili ungati ndaghilo isha bhweghi. Paapo umukolo yuuyo eeghiighwe, akulongoshighwanga ni ndaghilo isha bhweghi akabhalilo kooshi kaako umulume mwumi. Loole linga umulume aafwa, umukolo uyo akubha mwabhuke ukufuma ku ndaghilo isho.

³ Po linga umukolo uyo eeghighwa nu muli-isha umunine bhwo umulume ghwake mwumi, umukolo uyo akubha mushipani. Loole linga umulume aafwa, indaghilo isho shitakumupinya soona, akubha mwabhuke ukweghighwa nu muliisha umunine, atakubha mushipani.

⁴ Mwe bhiitiki bhanyiitu, ishi bhwo shili na kukwinyu. Nuumwe mutakulongoshighwa soona ni ndaghilo isha Moose paapo muli ungati mukafwa pamupeene nu Kilisiti pa chikobhekano. Ku sila iyo, umwe mwe bhandu bhaake yuuyo uChaala akamushuusha ukuti utwe tweshi tubhombaghe shiisho shikumuhobhosha uChaala.

⁵ Paapo akabhalilo kala bhwo tukulongoshighwa nu bhundu ubhwa mbiibhi, indaghilo shikapela ifinyonywa ifya kubhomba imbiibhi

fibhe na maka mu mibhili yiitu. Ifinyonywa ifyo fikupela ukuti ubhumalilo bhwake tufwange.

⁶ Loole ulu twabhuliighwe ukufuma ku ndaghilo isha Moose, paapo tufwile ku shila shiisho shikatupinyagha. Po manye tumubhombelaghe uChaala ku sila inguulu iya kushikonga indaghilo isho, loole ku sila imbya iya kulongoshigwa nu Mbepo uMwelu.

Imbombo iya ndaghilo

⁷ Kali, tuyughe kooni? Kali, tuyughe ukuti indaghilo mbiibhi? Nashiku, indaghilo shitaa mbiibhi na kaakanandi paapo linga indaghilo shitakabhangaapo, une ngali indashimeenye imbiibhi. Linga indaghilo shitakatingi, “Manye unyonywange,”[☆] une ngali indameenye ukuti ukunyonywa mbiibhi.

⁸ Loole bhwo naashimanya indaghilo isho, imbiibhi shikaambela ukuti imbe ni finyonywa ifibhiibhi ifya luko nu luko. Paapo chishita ndaghilo, imbiibhi shitali na maka.

⁹ Amashiku agha kunyuma ingikalagha chishita kushimanya indaghilo isha Chaala. Loole bhwo naashimanya indaghilo, po imbiibhi shikabha nyuumi, po shikaambeleda ubhufwe.

¹⁰ Ingashaaghania ukuti indaghilo isho shiisho shikabha sha kuumba ubhwumi, shikaambeleda ubhufwe.

¹¹ Paapo ku sila iya ndaghilo isho, imbiibhi shikayaagha isila iya kuushimbula nu kuumbeleda ubhufwe.

[☆] **7:7 7:7** Bhufumilo 20:17; Ngumbusho isha Ndaghilo isha Moose 5:21

12 Po indaghilo nyeelu, nyiisa soona sha nalooli.

13 Kali, indaghilo inyiisa isho sho shiisho shipelite ukuti ifwange? Nashiku! Loole ku sila iya ndaghilo inyiisa isho, imbiibhi shikaanda ukubhoneka ukuti mbiibhi nalooli nu kuumbelela ubhufwe. Po ukughendela ku ndaghilo isho, imbiibhi shikiilangisha pabhwelu ubhubhi-ibhi bhwake muumwo bhubheeliile.

14 Paapo tumeenye ukuti indaghilo shifumite kwa Chaala, loole une nee munduushe, nee ingulongoshighwa ni mbiibhi.

15 Nalooli une indakwimanya shiisho ingubhomba, paapo shila shiisho ingulonda ukubhomba, indakubhomba, loole ingubhomba shila shiisho indakushilonda.

16 Linga ingubhomba shila shiisho indakushilonda, po ingwitika ukuti indaghilo nyiisa.

17 Ku nongwa iyo, indaa neene ingushibhomba shiisho indakushilonda, loole bhundu ubhwa mbiibhi bhubhwo bhuli mu ndumbula yangu.

18 Une imeenye ukuti litalimwo ilyisa naalimo mu ndumbula yangu ku nongwa iya bhundu bhwangu ubhwa mbiibhi. Paapo pamupeene nu kuti ingulonda ukubhomba shiisho nyiisa, poepe ingupootwa ukushibhomba.

19 Paapo ilyisa liilyo ingulonda ukubhomba, indakulibhomba, loole ingulibhomba ibhiibhi liilyo indakulilonda.

20 Po linga ingubhomba shila shiisho indakushilonda, indaa neene ingushibhomba, loole mbiibhi yila yiiyo yili mu ndumbula yangu.

²¹ Po ulu naashaaghania ukuti linga ingulonda ukubhomba liilyo lyisa, ingwagha ingubhomba liilyo libhiibhi.

²² Ku nongwa iyo, ishighanite leka indaghilo isha Chaala ni ndumbula yangu yooshi.

²³ Loole naashaaghania ukuti utumbakaasha twangu tukulongoshighwa na maka agha mbiibhi, ghaagho ghakulwana ni nyinong'ono shangu inyiisa. Amaka agha mbiibhi agho gho ghaagho ghakuumbela ukuti imbe mutumwa ughwa mbiibhi.

²⁴ Lwangu une! Kali, ghwini yuuyo indiaamboke une ku mubhili ughu ghuughwo ghukufwa?

²⁵ Ingumupaalisha uChaala, yuuyo akutupoka ku sila iya Malafyale ghwitu uYeesu Kilisiti! Tesha! Ku sila iya nyinong'ono shangu, ingulonda ukushikonga indaghilo isha Chaala, loole ku sila iya bhundu bhwangu ubhwa mbiibhi, indi mutumwa ughwa mbiibhi.

8

Ukwikala isa muumwo uMbepo uMwelu akulondela

¹ Po ulu uChaala ataaakabhafunde abhandu bhaabho bhali pamupeene nu Kilisiti uYeesu mu bhwumi bhwabho.

² Paapo ku sila iya Kilisiti uYeesu, amaka agha Mbepo uMwelu yuuyo akutupa ubhwumi ghanyaabhwile ukufuma ukulongoshighwa na maka agha mbiibhi na gha bhufwe.

³ Indaghilo isha Moose shitakabha na maka agha kutwabhula ukufuma ku mbiibhi ku nongwa iya bhundu bhwitu ubhwa mbiibhi.

Yo yiiyo nongwa uChaala akamutuma uMwana ghwake yuuyo akabha nu mubhili ungati mibhili yiitu ukuti afwe ku nongwa iya mbiibhi shiitu. Ku sila iya mubhili ghwake ughwo, akaghapoota amaka agha mbiibhi.

⁴ UChaala akabhomba ulwo ukuti shiisho sha nalooli shibhombighwe isa muumwo indaghilo shikulondela kukwitu utwe twe tutakulongoshighwa nu bhundu bhwitu ubhwa mbiibhi, loole tukulongoshighwa nu Mbepo uMwelu.

⁵ Po abhandu bhooshi bhaabho bhakulongoshighwa nu bhundu ubhwa mbiibhi, bhakwinong'onagha ukubhomba isa muumwo ubhundu ubhwa mbiibhi bhukulondela, loole abhandu bhaabho bhakulongoshighwa nu Mbepo uMwelu, bhakwinong'onagha ukubhomba isa muumwo uMbepo uMwelu akulondela.

⁶ Umundu yuuyo akulongoshighwa nu bhundu ubhwa mbiibhi, akwilondela ubhufwe, loole yuuyo akulongoshighwa nu Mbepo uMwelu, uChaala indiakamupe ubhwumi nu lutengaano.

⁷ Paapo umundu ghweshi yuuyo akulongoshighwa nu bhundu ubhwa mbiibhi, mulughu ghwa Chaala, soona atabhangiile ukushikonga indaghilo shaake na kaakanandi.

⁸ Yo yiiyo nongwa abhandu bhaabho bhakulongoshighwa nu bhundu ubhwa mbiibhi, bhatabhangiile ukumuhobhosha uChaala.

⁹ Loole umwe mutakulongoshighwa nu bhundu ubhwa mbiibhi, loole mukulongoshighwa nu Mbepo uMwelu linga akwikala mu ndumbula shiinyu. Umundu ghweshi

yuuyo uMbepo ughwa Kilisiti* atakwikala mu ndumbula yaake ataa mukongi ghwa Kilisiti.

¹⁰ Loole linga uKilisiti akwikala mu ndumbula shiinyu, imibhili yiinyu yifwile ku nongwa iya mbiibhi, loole uMbepo uMwelu abhapiile ubhwumi ku nongwa iya kuti uChaala abhabhelengile ukubha bhanalooli.

¹¹ UMbepo uMwelu yuuyo akamushuusha uYeesu akwikala mu ndumbula shiinyu. Po isa muumwo uChaala akamushuusha uKilisiti uYeesu, indiakayipe ubhwumi imibhili yiinyu yiyo yikufwa ku maka agha Mbepo ghwake yuuyo akwikala mu ndumbula shiinyu.

¹² Mwe bhiitiki bhanyiitu, utwe tutakulondighwa twikalaghe isa muumwo ubhundu bhwitubhwa mbiibhi bhukulondela,

¹³ paapo linga mukwikala isa muumwo ubhundu ubhwa mbiibhi bhukulondela, indimukafwe, loole linga ku maka agha Mbepo ughwa Chaala mwaleka ukubhomba imbiibhi, nalooli indimukiikalaghe nu Chaala bhwila na bhwila.

¹⁴ Abhandu bhooshi bhaabho bhakulongoshighwa nu Mbepo uMwelu, abho bho bhaabho bhaana bha Chaala.

¹⁵ Paapo uChaala atakabhapa uMbepo uMwelu ukuti mumwoghpaghe isa abhatumwa, loole akabhapa uMbepo uyo ukuti mubhe bhaana bhaake. Po uMbepo uyo ghwe yuuyo akutwafwa ukuti tumwitishange uChaala “Aabha,” kwo kuti, “Taata.”

* **8:9 8:9 UMbepo ughwa Kilisiti** Kwo kuti, *UMbepo uMwelu*.

¹⁶ UMbepo uyo akushimikisha mu ndumbula shiitu ukuti twe bhaana bha Chaala.

¹⁷ Ku nongwa iya kuti utwe twe bhaana abha Chaala, inditukapokeele isayo ukufuma kukwake shiisho abhabhiikiile abhandu bhaake. Soona inditukapokeele isayo isho pamupeene nu Kilisiti paapo linga tukushaagha indamyo pamupeene naghwe, po inditukabhwaghe ubhukulumba pamupeene naghwe.

UChaala indiakhape ulughindiko abhaana bhaake

¹⁸ Indamyo shiisho tukushaagha akabhalilo aka kandu kanandi leka ukughelesha nu bhukulumba bhuhwwo uChaala indiakatusetulile mu kabhalilo kaako kakwisa.

¹⁹ Paapo ifipelighwa fyoshi fikulindilila ni ndumbula yooshi akabhalilo kaako uChaala indiakhasetule pabhwelu bhaabho bhaana bhaake nalooli.

²⁰ Ifipelighwa fyoshi fikasanuka nu kushita kubha ni mbombo naayimo, fitakiighana fyene, loole ghwi Chaala akiighana. Loole poope ulusu-ubhilo lukaali luliipo ku fipelighwa ifyo,

²¹ ukuti manye fikomanikaghe, loole fikapokeele ubhwabhuke ubhwa bhukulumba bhuhwwo uChaala indiakhape abhaana bhaake.

²² Paapo tumeenye ukuti ukufika akabhalilo aka, ifipelighwa fyoshi fikulila pamupeene ku bhuhhafu isa ubhubhafu ubhwa mukolo yuuyo akupaapa umwana.

²³ Soona fitaa fipelighwa fyene fiifyo fikulila ku nongwa iya bhuhhafu, loole nuutwe twe tupokeelite iseke isha kwanda isha Mbepo uMwelu

ukufuma kwa Chaala, tukulila mu ndumbula shiitu, bhwo tukulindilila ku lusuubhilo uChaala ukutubhiika ukubha bhaana bhaake. Indiakabhombe ulwo ku sila iya kutupa imibhili imipya isa muumwo akafinga.

²⁴ Paapo uChaala atupiile ulusuubhilo ulwo ukwandila muumwo akatupoka. Loole linga tukusubhaalila akandu kaako tukukabhona, po ulwo lutakubha lusuubhilo soona. Kali, ghwini yuuyo akusubhaalila akandu kaako akukabhona?

²⁵ Loole linga tukusubhaalila akandu kaako tutakukabhona, po tukwendelela ukulindilila chishita kulita.

²⁶ Bhubhuubhwo, uMbepo uMwelu akutwafwa ku bhwonywa bhwitu paapo tutameenye ukwipuuta kwa Chaala isa muumwo tukulondighwa ukwipuuta. Loole uMbepo uyo akutwipuutula kwa Chaala nu kulila ku bhuswimaane bhuubhwo tutabhaghiile ukubhulingaania.

²⁷ UChaala yuuyo ashimeenye inyinong'ono isha bhandu bhooshi, ghwe yuuyo ayimeenye ni nyango iya Mbepo uMwelu. Paapo uMbepo uyo akubhasuumila abhiitiki kwa Chaala isa muumwo uChaala akulondela.

²⁸ Tumeenye ukuti uChaala akubhomba imbombo shooshi ku nongwa iya kubhapa inyiisa bhaabho bhamughanite, kwo kuti bhala bhaabho abhiitishiishe ukukongana nu bh-wighane bhwake mwene.

²⁹ Paapo bhala bhaabho uChaala akabhamanya ukufuma kubhwandilo, bho

bhaabho akabhasala ukuti bhabhe isa uMwana ghwake ukuti uMwana uyo abhe ghwi katoote mu bhiitiki bhooshi abha Chaala.

³⁰ Po abho bhaabho uChaala akabhasala ukubha bhandu bhaake, bho bhaabho akabhiitisha, akabhabhelengela ukubha bhanalooli, soona bho bhaabho akabhapa ubhukulumba bhwake.

Ataliipo naayumo yuuyo indiakatulekaanie nu lughano ulwa Kilisiti uYeesu

³¹ Kali, ulu tuyughe kooni ku mbombo ishi? Linga uChaala ali kulubhafu lwitu, kali, ghwini yuuyo abhaghiile ukutupoota?

³² UChaala atakamupelela ichisa uMwana ghwake, loole akamufumya ukuti afwe ku nongwa yiitu tweshi. Linga uChaala akabhomba ulwo, kali, ataaakatupe pabhuubhu nuutwe utundu twoshi pamupeene naghwe?

³³ Kali, ghwini yuuyo indiakabhasitaake abhandu bhaabho uChaala abhasalite? Inguyugha ulwo paapo umwene ghwe yuuyo akubhabhelengela abhandu ukubha bhanalooli.

³⁴ Kali, ghwini yuuyo indiakatulonge? Ataliipo naayumo yuuyo indiakatulonge paapo uKilisiti uYeesu yuuyo akafwa nu kushuuka, akwikala ku kakono aka kumwisa aka Chaala, ukwo kwo kuukwo akutusuumila.

³⁵ Kali, kooni kaako kabhaghiile ukutulekaania nu lughano luulwo uKilisiti akululangisha kukwitu? Kali, ndamyo, kulabha pamu sala, kushita kubha ni myenda, sha kwoghofya pamu bhufwe?

³⁶ Isho shiisho naayugha shili isa muumwo shisimbiighwe mu Masimbo aMeelu ukuti,

“Amashiku ghooshi tukughoghighwa
 ku nongwa iya kukubhombela ughwe.
 Abhandu bhakutubhombela akabhiibhi
 ungati bhonang’ooshi bhaabho bhakuya
 pakughoghighwa.”✧

³⁷ Nalinga shooshi isho shikutwagha, utwe tukwendelela ukupoota ukughendela kwa Kilisiti yuuyo atughanite.

³⁸ Paapo imeenye nalooli ukuti kataliipo akandu naakamu kaako kabhaghiile ukutulekaania nu lughano ulwa Chaala. Bhubhe bhwumi pamu bhufwe, abhandumi pamu imbepo imbiibhi, shiisho shiliipo ulu pamu shiisho indishikabheepo mundaashi, pamu ifipelighwa fyoshi ifya maka. Fyoshi ifyo fitabhaghiile ukutulekaania nu lughano lwake.

³⁹ Kataliipo akandu naakamu kumwanya pamu ku bhushuuka, pamu ichipelighwa chooshi chila chiicho indichikatulekaanie nu lughano ulwa Chaala luulwo alangishiishe kukwitu ukughendela kwa Malafyale ghwitu uKilisiti uYeesu.

9

Abhandu bhaabho uChaala abhasalite

¹ Inguloolika ukuti shiisho inguyugha sha nalooli ku nongwa iya kubha pamupeene nu Kilisiti. Soona nu Mbepo uMwelu akushimikisha mu ndumbula yangu ukuti indakuyugha ubhumyashi.

² Ubhwanalooli bhwa kuti indi nu bhushwimaane ubhukulu nu bhubhafu bhuubhwo bhutakushila mu ndumbula yangu

✧ 8:36 8:36 Sabhuli 44:22

³ ku nongwa iya bhoghwamwitu aBhaisilaeli. Paapo linga bhwali bhwichane bhwangu, une yuneene niighanite ukughunighwa nu kwepushighwa nu Kilisiti ukuti abhakamu bhangu bhapokighwe.

⁴ ABhaisilaeli abho bhaabho uChaala akabhapela bhabhe bhaana bhaake, akabhalangisha ubhukulumba bhwake nu kwitikana* nabho. Soona akabhapa indaghilo ni fingo shaake nu kubhalongosha muumwo bhakulondighwa bhamwipuutaghe umwene.

⁵ ABhaisilaeli abho bhiisukulu abha Abhulahamu, Isiyaka nu Yaakobhu. Ukukongana nu bhundu, nu Kilisiti ghwepe Mwisilaeli. Umwene ghwi Chaala yuuyo akulongosha utundu twoshi, soona akulondighwa apaalighwange bhwila na bhwila! Amen.

⁶ Kali, imbaghiile ukuyugha ukuti uChaala akapootwa ukubhomba shiisho akafinga ku Bhaisilaeli? Nashiku! Paapo bhataa Bhaisilaeli bhooshi bhaabho uChaala abhasalite ukubha bhandu bhaake.

⁷ Soona kwo kuti bhataa bhandu bhooshi bhaabho bhakufuma mu mbaapo iya Abhulahamu, bhaabho bhaana bhaake abha nalooli. Loole uChaala akafinga kwa Abhulahamu akati, "Abhaana bhaako indibhakafume mu mbaapo iya Isiyaka."☆

⁸ Inongwa ishi kwo kuti abhaana abha nalooli abha Chaala bhataa bho bhala bhaabho bhaka-paapighwa ukukongana nu bhwichane ubhwa

* **9:4 9:4 Kwitikana** Bhelenga ishu ilya **Ulwitikano** ku Mashu aMaheesha. ☆ **9:7 9:7 Bhwandilo 21:12**

Abhulahamu, loole bho bhala bhaabho bhaka-paapighwa ukukongana nu lufingo ulwa Chaala.

⁹ Paapo uChaala akafinga kwa Abhulahamu akati, “Indiingaghaluke ku chinja akabhalilo isa kakaaka, tesha, uSaala umukashi ghwako indi-akabhe nu mwana umuliisha.”☆

¹⁰ Soona shita sho shishiisho sheene, loole bhwo usekulu ghwitu uIsiyaka aakula, akamwegha uLeebheka, ghwepe akapaapa abhombasa.

¹¹⁻¹² Loole bhwo abhombasa bhala bhakaali ukupaapighwa nu kwanda ukubhomba inyiisa pamu imbiibhi, uChaala akamubhuula uLeebheka akati, “Umwana usongo indiakamubhombelaghe umukeke.”☆ UChaala akamubhuula ulwo ukulangisha ukuti umwene atakumusala umundu ukukongana ni mbombo shaake, loole akumusala ukukongana na muumwo abhaatikile yuuyo mwene.

¹³ Ishi shigheliile na shiisho shisimbiighwe mu Masimbo aMeelu ukuti, “Ingamughana uYaakobhu, loole ingamubhenga uEesabhu.”☆

UChaala akubhomba isa muumwo iighaniile

¹⁴ Kali, ulu tuyughe kooni? Kali, tuyughe ukuti uChaala atakubhomba ubhwanalooli? Nashiku!

¹⁵ Paapo akamubhuula uMoose akati, “Une indiimupelele ichisa nu kumwafwa umundu gh-weshi yuuyo niighanite ukumupelele ichisa.”☆

☆ **9:9 9:9** Bhwandilo 18:10, 14 ☆ **9:11-12 9:11-12** Bhwandilo 25:23 ☆ **9:13 9:13** Malaaki 1:2-3 ☆ **9:15 9:15** Bhufumilo 33:19

¹⁶ Ku nongwa iyo, shooshi isho shitakubhom-bighwa ukukongana nu bhwichane pamu uk-wikaakila ukwa mundu, loole ukukongana ni chisa icha Chaala.

¹⁷ Paapo uChaala akamubhuula uFalaabho isa muumwo shisimbiighwe mu Masimbo aMeelu ukuti, “Ingakubhiika ukubha ghwe malafyale ukuti ku sila iya bhulongoshi bhwako, imbalangishe abhandu amaka ghangu nu kuti ingamu yangu yifumukwange mu chiisu chooshi.”✧

¹⁸ Ku nongwa iyo, shili pabhwelu ukuti uChaala akumupelela ichisa umundu ghweshi isa muumwo iighaniile, nu kumubhiika umundu ukubha ni ndumbula ingafu isa muumwo iighaniile.

¹⁹ Umundu abhaghiile ukuumbuusha ukuti, “Linga bhwo shili ulwo, kali, kooni uChaala akutulonga? Kali, ghwini yuuyo abhaghiile ukukaanikana na shiisho uChaala akulonda?”

²⁰ Ghwe mundu ughwe, kali, ghwe ghwini ghwe kumwamula uChaala? Kali, ingumbe yibhaghiile ukumubhuusha yuuyo akayimatagha ukuti, “Kali, kooni ukaamata isa ulu?”✧

²¹ Kali, umumata ngumbe atali na maka agha kumata ingumbe shibhili ku imato limolyene ilyo, ingumbe yimo yibhe ni mbombo iya lughindikiko, ni nine yibhe ni mbombo yiiyo yitaa ya lughindikiko?

²² Ulu, isho bhwo shili na kwa Chaala. Pamupeene nu kuti uChaala mwabhuke ukulangisha ilyoyo lyake na maka ghaake, poope akakibha ku

bhandu bhaake bhaabho bhakamukalalishanga,
bhaabho akabhaatika ukubhapyuta.

23-24 Akabhomba ulwo ku nongwa iya kuti
akalondagha ukulangisha ubhukulumba bh-
wake ubhukulu. Akatusala utwe tweshi twe
Bhayuuta nuutwe twe tutaa Bhayuuta ukuti
atupelele ichisa, paapo akabha atutendekeshi-
ishe ukuti tupokeele ubhukulumba pamupeene
naghwe.

25 Ishi shili isa muumwo shisimbiighwe mu
Masimbo aMeelu nu musololi uHoseeya, uChaala
akuti,

“Abho bhaabho bhataa bhandu bhangu,
indiingabhiitishe ukubha, ‘Bhandu bhangu.’
Abhandu bhaabho indakabhaghana,
indiingabhiitishe, ‘Bhaghanighwa bhangu.’
”☆

26 Soona,

“Pabhuyo pala pala paapo bhakabhuulighwa
ukuti,
‘Umwe mutaa bhandu bhangu,’
po paapo indibhakiitishighwe ukuti,
‘Bhaana abha Chaala yuuyo mwumi.’ ”☆

27 Ghwepe umusololi uYesaaya akuyugha ulu ku
nongwa isha Bhaisilaeli akuti,

“Pamupeene nu kuti aBhaisilaeli bhingi ungati
musanga ughwa ku nyanja,
poope bhanandiishe bhaabho indib-
hakupokighwe.

28 Paapo uMalafyale uChaala indiakabhalonge
abhandu bhooshi abha mu chiisu ichi,

soona indiakabhalonge lubhilo isa muumwo akayughila.”☆

29 Inongwa ishi shili isa muumwo uYesaaya akasolola kubhwandilo akati,
 “Linga uMalafyale uChaala ughwa Maka
 Ghooshi
 atakabhalekagha abhandu bhamu mu
 chikolo icha Bhaisilaeli,
 po ngali tukapyutighwa tweshi isa abhandu
 abha mu kaaya aka Sondoma na ka Gho-
 moola.”☆

*ABhaisilaeli bhoope bhakulondighwa
 ukuyitika iNongwa iNyuisa*

30 Kali, tuyughe kooni? Pamupeene nu kuti abhandu bhaabho bhataa Bhayuuta bhatakabhombela amaka ghaabho ukuti uChaala abhabhelengele ukubha bhanalooli, poope akabhabhelengela ukubha bhanalooli ku sila iya kumwitika uKilisiti kwene.

31 Soona, pamupeene nu kuti aBhaisilaeli bhakiikaakilagha ku maka ghaabho ghooshi ukushikonga indaghilo ukuti uChaala abhabhelengele ukubha bhanalooli, poope uChaala atakabhabhelengela.

32 Kali, kooni uChaala atakabhabhelengela ukubha bhanalooli? UChaala atakabhomba ulwo ku nongwa iya kuti bhakasubhaalilagha imbombo shaabho ukukinda ukumwitika uKilisiti. Po bhakiipuutula nu kughwa mu lwitiko lwabho isa muumwo umundu akwipuutula pi iyondo ikulu nu kughwa.☆

☆ 9:28 9:27-28 Yesaaya 10:22-23

☆ 9:29 9:29 Yesaaya 1:9

☆ 9:32 9:32 Yesaaya 8:14

33 Inongwa ishi shili isa muumwo shisimbi-
ighwe mu Masimbo aMeelu nu musololi uYe-
saaya ukuti,

“Tasha, ingubhiika iyondo ku kaaya aka Siyooni†
ukwo,
liilyo abhandu indibhakiipuutulaghe,
iyondo liilyo indilikabhapelelaghe abhandu
ukuti bhaghwange.

Loole umundu ghweshi yuuyo indiakamwitik-
aghe umundu uyo yuuyo liyondo ilyo,
ataaakakoshighwe isoni naalumo.”☆

10

1 Mwe bhiitiki bhanyiitu! Shiisho ingun-
yonywa mu ndumbula yangu nu kwipuuta
kwa Chaala sha kuti aBhaisilaeli abhanyiitu
bhapokighwe.

2 Paapo ingushimikisha kukwinyu ukuti
abhandu abho bhakwikaakila leka ukumukonga
uChaala, loole bhatameenye isila inyiisa
muumwo bhakulondighwa ukumukonga.

3 Abheene bhatakayimanya isila yiiyo uChaala
akubhabhelengela abhandu ukubha bhanalooli,
loole bhakalondagha ukuti uChaala abhabhelen-
gele ukubha bhanalooli ku sila iya kushikonga
indaghilo isha Moose.

4 Loole bhwo uKilisiti iisa, bhukabha bhu-
malilo ubhwa maka agha ndaghilo isha Moose,
ukuti ghweshi umundu yuuyo akumwitika

† 9:33 9:33 *Akaaya aka Siyooni* Kwo kuti, Yelusaloomu, akaaya
akeelu aka Chaala. ☆ 9:33 9:33 Yesaaya 8:14; 28:16

umwene, uChaala amubhelengele ukubha ghwanalooli.

Abhandu bhooshi bhabhaghiile ukupokighwa

⁵ Ukukongana ni sha Chaala ukumubhelengela umundu ukubha ghwanalooli ku sila iya kukonga indaghilo, uMoose akasimba ukuti, “Umundu ghweshi yuuyo akushikonga indaghilo, akubha mwumi ku sila iya indaghilo isho.”[☆]

⁶ Loole ku sha Chaala ukumubhelengela umundu ukubha ghwanalooli ku sila iya kwitika, shisimbiighwe mu Masimbo aMeelu ukuti, “Manye mwibhuushange mu ndumbula shiinyu ukuti, ‘Kali, ghwini yuuyo indiakwele ukubhuuka kumwanya?’ ” Linga kuyugha ulwo kwo kuti, kumupela uKilisiti ukuti iise mu chiisu.

⁷ “Pamu manye mubhuushange ukuti, ‘Kali, ghwini yuuyo indiakiike ukufika ku bhushuuka?’ ” Paapo ukuyugha ulwo kwo kumutiisha uKilisiti ukufuma ku bhushuuka.[☆]

⁸ Kali, shisimbiighwe bhuleele mu Masimbo aMeelu? Shisimbiighwe ukuti, “Ishu ilya Chaala lili papiipi nuughwe, lili mu mulomu ghwako na mu ndumbula yaako.”[☆] Ishu ilyo ndumi iya kumwitika uKilisiti yiiyo tukuyilumbilila.

⁹ Po linga kuyugha pandaashi pa bhandu ukuti, “UYeesu ghwi Malafyale,” nu kwitika mu ndumbula yaako ukuti uChaala akamushuusha, po uChaala indiakupoke.

[☆] **10:5 10:5** Bhalaabhi 18:5 [☆] **10:7 10:6-7** Ngumbusho isha Ndaghilo isha Moose 30:12-13 [☆] **10:8 10:8** Ngumbusho isha Ndaghilo isha Moose 30:14

10 Paapo linga umundu akwitika mu ndumbula yaaake, uChaala akumubhelengela ukubha ghwanalooli. Soona, umundu yula yuuyo akuyugha pandaashi pa bhandu ukuti uYeesu ghwi Malafyale, uChaala indiamupoke.

11 Paapo shisimbiighwe mu Masimbo aMeelu ku sha Mesiiya ukuti, “Ghweshi umundu yuuyo akumwitika, ataaakakoshighwe isoni na kaakanandi.”☆

12 Paapo uMuyuuta atali pashima na yuuyo ataa Muyuuta. UMalafyale yuuyo ali yumoywene, ghwi Malafyale ughwa bhandu bhooshi, ghwepe akubhasaya ngaani abhandu bhooshi bhaabho bhakumusuma.

13 Ishi shili isa muumwo shisimbiighwe mu Masimbo aMeelu ukuti, “Umundu ghweshi yuuyo akumwitisha uMalafyale, indiapokighwe.”☆

14 Po kali, abhandu bhabhaghiile bhuleele ukumusuma yuuyo bhatamwitikite? Soona, kali, bhabhaghiile bhuleele ukumwitika yula yuuyo bhatapulikite inongwa shaake? Soona, kali, bhabhaghiile bhuleele ukupulika inongwa shaake linga ataliipo umundu ughwa kushilumbilila?

15 Kali, bhoope abhandu bhabhaghiile bhuleele ukulumbilila inongwa isho chishita kutumighwa? Yo yiiyo nongwa shisimbiighwe mu Masimbo aMeelu ukuti, “Shikuhobhoshaleka linga abhandu bhamu bhakwisa pakulumbilila inongwa inyiisa!”☆

☆ 10:11 10:11 Yesaaya 28:16

☆ 10:13 10:13 Yooheli 2:32

☆ 10:15 10:15 Yesaaya 52:7

16 Pamupeene nu kuti aBhaisilaeli bhakalum-bililighwa iNongwa iNyiisa iyo, poope abhingi bhatakayiitika. Paapo umusololi uYesaaya akasimba mu Masimbo aMeelu ukuti, “Ghwe Malafyale Chaala, kali, ghwini yuuyo akayiitika indumi yiitu?”✧

17 Ku nongwa iyo, abhandu bhakwitika linga bhaashipulika inongwa isha Kilisiti, soona bhakushipulika linga shikulumbililighwa.

18 Loole ingubhuusha, “Kali, aBhaisilaeli bhatapulikite lumo?” Ubhwanalooli bhwa kuti, bhakapulika. Paapo shisimbiighwe mu Masimbo aMeelu ukuti,

“Ishu lyabho likapulikighwa mu chiisu chooshi, na mashu ghaabho ghafikite ukufika kubhumalilo ubhwa chiisu.”✧

19 Ingubhuusha soona ukuti, “Kali, bhwo aBhaisilaeli bhaapulika, bhatakashaaghania?” Bhakashaaghania, paapo akabhalilo aka Moose, uChaala akabhabhuula akati,

“Indiingabhapele umwe ukuti mubhe nu lwibhuno

ku nongwa iya bhandu abha fyisu ifinine. Indiingabhapele ukuti mukakalalaghe

ku nongwa iya bhandu bhaabho bhatakushaaghania.”✧

20 Soonu, umusololi uYesaaya akuyugha ku maka amashu agha Chaala akuti,

“Abhandu bhaabho bhatakaandondagha, bho bhaabho bhakaanyaagha.

Ingiilangisha ku bhandu bhaabho

✧ 10:16 10:16 Yesaaya 53:1 ✧ 10:18 10:18 Sabhuli 19:4

✧ 10:19 10:19 Ngumbusho isha Ndaghilo isha Moose 32:21

bhatakaambuushikishanga inongwa
shangu.”☆

21 Loole ku sha Bhaisilaeli, uChaala akuti,
“Umuusi ghwoshi naabhasondagha nu tukono
twangu
abhandu bhaabho bhakukaana ukuumbu-
lika,
soona indumbula shaabho ngafu.”☆

11

*UChaala atabhalekite abhandu bhaake aB-
haisilaeli*

1 Ulu ingubhuusha, kali, uChaala abhalekite
abhandu bhaake? Nashiku, atabhalekite na
kaakanandi! Paapo nuune nee Mwisilaeli, nee
yumo ukufuma mu mbaapo iya Abhulahamu,
mu chikolo icha Bhenjamiini.

2 UChaala atabhalekite abhandu bhaake
bhaabho akabhasala ukufuma kubhwardilo.
Kali, mutashimeenye shiisho shisimbiighwe
mu Masimbo aMeelu ku sha Eliiya muumwo
akamulilila uChaala ku nongwa iya Bhaisilaeli?

3 UEliiya akayugha akati, “Ghwe Malafyale
Chaala, abhandu abha bhabhaghoghite abha-
sololi bhaako nu kukomania ichighemo icha ku-
fumikisha ifyabhupe. Ulu naashaala nimwene,
soona bhakulonda ukuungogha nuune!”☆

4 Kali, uChaala akamwamula bhuleele uEliiya?
Akamwamula akati, “Niibhiikiile abhandu ab-
hoelufu bhahaano na bhabhili (7,000) mu chiisu

☆ 10:20 10:20 Yesaaya 65:1 ☆ 10:21 10:21 Yesaaya 65:2 ☆ 11:3
11:3 1 Bhanyafyale 19:10, 14

icha Isilaeli bhaabho bhatamwipuutite naalumo uBhaali.”✠*

⁵ Isho bhwo shili na mu kabhalilo aka, paapo bhaliipo abhandu bhanandi bhaabho bhashaalite bhaabho uChaala akabhasala ku chisa chaake.

⁶ Linga uChaala akabhasala ku chisa chaake, po atakubhapoka ku nongwa iya mbombo shisho bhashibhombite. Paapo linga akabhapok- agha ku nongwa iya mbombo shaabho, po ichisa chaake ngali chitaa chisa soona.

⁷ Po ishi shili ulu, aBhaisilaeli bhakalondagha ukubhelengighwa ukubha bhanalooli, loole bhakapootwa. Loole bhala bheene bhaabho uChaala akabhasala bho bhaabho bhakabhwagha. Bhala bhooshi bhaabho atakabhasala, uChaala akapela indumbula shaabho ukubha ngafu,

⁸ isa muumwo shisimbiighwe mu Masimbo aMeelu ukuti,

“UChaala akabhabhiika bhabhe ungati bhandu bhaabho bhakoliighwe nu tulo, akabhashighila amaaso ukuti manye bhate- shange,

soona akabhashindila ifyufwo ukuti manye bha- pulikaghe,

bhoope bhali bhula bhula ukufika umuusughu.”✠

✠ **11:4 11:4** 1 Bhanyafyale 19:18 * **11:4 11:4 UBhaali** Ichi chikabha chifwani chiicho abhandu bhakachiipuutagha ungati ghwi Chaala, loole ngimba ataa ghwi Chaala. ✠ **11:8 11:8** Ngumbusho isha Ndaghilo isha Moose 29:4; Yesaya 29:10

9 Ghwepe umalafyale uNdaabhiti akayugha akati,

“Bhwo bhali pa lusekelo lwabho,
uChaala alusanushe ulusekelo ulwo,
lubhe kapingo aka kubhakola nu kubhafunda.

10 Amaaso ghaabho ghali nu lufubheela ukuti manye bhateshange,
imyongoloolo yaabho yighombaane akabhalilo kooshi.”☆

Ukupokighwa ukwa bhaabho bhataa Bhaisilaeli

11 Ulu ingubhuusha soona, kali, bhwo aBhaisilaeli bhiipuutula, bhakaghwa lwoshi? Nashiku! Loole ku nongwa iya mbiibhi shaabho, uChaala abhapokite abhandu bhaabho bhataa Bhaisilaeli ukuti aBhaisilaeli bhabhe nu lwibhuno.

12 Linga abhandu bhaabho bhataa Bhaisilaeli bhapokeelite ulusayo ku nongwa iya Bhaisilaeli bhaabho bhakamukaana uMupoki, kali, bhataabhakapokeele ulusayo ulukulu linga aBhaisilaeli bhooshi bhaamwitika uMalafyale uMupoki?

13 Ulu inguyugha nuumwe mwe mutaa Bhaisilaeli. Ingwipaala leka ku nongwa iya mbombo yiiyo uChaala aambiile, iya kubha mutumighwa ku bhandu bhaabho bhataa Bhaisilaeli.

14 Paapo ingulonda aBhaisilaeli abhanyiiitu bhanyonywange shiisho uChaala akubhabhombela umwe ukuti bhamu pakati papaabho bhapokighwange.

15 Bhwo aBhaisilaeli bhaamukaana uYeesu, uChaala akafwana na bhandu bhaabho bhataa

Bhaisilaeli. Po linga uChaala aaya aabhiitika aBhaisilaeli soona, indishikabhe ungati bhandu bhaabho bhakafwa, bhaashuuka!

¹⁶ Linga umundu aafumya ifindu ifya kwanda ukufuma mu findu fyake ku nongwa iya mbombo iya Chaala, po ifindu fyoshi fiifyo fikushaala fyope fikubha fyelu. Soona linga imishu iya likokwe myelu, po nu tusamba twake twope tukubha twelu.

¹⁷ Umwe mwe mutaa Bhaisilaeli muli ungati tusamba utwa mushunguti ughwa mu chiposo, loole aBhaisilaeli bhali ungati tusamba utwa mushunguti umwisa ughwa mu mughunda. Utusamba utwa mushunguti ughwa mu chiposo, tulungiighwe pabhuyo ubhwa tusamba tuutwo tukendiighwe utwa mushunguti umwisa ughwa mu mughunda. Ku nongwa iyo, utusamba utwo tukupokeela isayo ukufuma ku mushunguti umwisa ughwo nu kwendelela ukukula akiisa.

¹⁸ Po manye mutufuuyaghe utusamba utwo tuutwo tukendiighwe. Manye mwifunaghe, loole mumanye ukuti imishu yitakubhasubhaalila umwe, loole umwe mwe mukuyisubhaalila imishu.

¹⁹ Pamu ubhaghiile ukuyugha ukuti, “Utusamba utwo tukakendighwa ukuti une indungighwe.”

²⁰ Isho sha nalooli. Utusamba utwo tukakendighwa ku nongwa iya kushita kwitika kwabho, loole ughwe ghwimite ku nongwa iya lwitiko lwako. Ubhange maaso, manye ghwifunaghe, loole ghwoghpaghe.

²¹ Paapo linga uChaala atakabhapelela ichisa

aBhaisilaeli bhaabho bhali ungati tusamba utumelela tula, kali, kwinong'ona ukuti indiakakupelele ichisa ughwe?

²² Tesha muumwo uChaala akubhapelela ichisa abhandu bhamu na muumwo akubhapa abhandu abhanine ulufundo ulukulu! Umwene akubhapa ulufundo ulukulu abhandu bhaabho bhatakamwitika, loole indiakubhombe-laghe akiisa ughwe linga kwendelela ukusubhaalila ichisa chaake. Loole linga nuughwe ghwaleka ukumwitika, indiukakendighwe.

²³ Bhoope aBhaisilaeli linga bhaamughalukila nu kumwitika uChaala, indibhakabhe pamupeene nu Chaala soona ungati tusamba tuutwo tukulungighwa soona pi ikokwe. Paapo uChaala ali na maka agha kubhalunga soona.

²⁴ Po linga utusamba utwa mushunguti ughwa mu chiposo tuutwo tumelela, tukakendighwa nu kulungighwa ku mushunguti ughwa mu mughunda, akandu kaako kali pashima na muumwo abhandu bhiisubhiile ukubhomba, kali, kutaa kupepe leka uChaala ukutughalusha utusamba utwa mushunguti tuutwo tukakendighwa nu kutulunga soona pabhuyo paapo tukakendighwa?

UChaala ali ni chisa ku bhandu bhooshi

²⁵ Mwe bhiitiki bhanyiitu, ingulonda mulumanye ulubhaatiko ulwa Chaala luulwo aalufifite, ukuti manye mwifunaghe. ABhaisilaeli bhamu bhakabha ni ndumbula ingafu, loole indumbula isho indishibhe ngafu ukufika paapo imbelengelo iya bhandu bhaabho bhataa Bhaisilaeli ukumwitika uYeesu indiyikabhe yaayilana.

26 Ku sila iyo, aBhaisilaeli bhooshi indibhakapokighwe. Isho shili isa muumwo shisimbiighwe mu Masimbo aMeelu ukuti,

“UMupoki indiakafumile mu kaaya aka Siyooni,[†] indiakabhapele abhaana abha Yaakobhu bhaleke ukumukaana uChaala.

27 Ulu Iwitikano Iwangu luulwo indiingiitikane nabho akabhhalilo kaako indiingabhahobhokele imbiibhi shaabho.”[☆]

28 Ku nongwa iya kukaana iNongwa iNyiisa isha Yeesu, aBhaisilaeli bhalughu bha Chaala ku nongwa iya kubhaafwa umwe mwe mutaa Bhaisilaeli. Loole uChaala akaali abhaghante abheene ku nongwa iya kuti akabhasala abhosekulu bhaabho nu kubhiika ulwitikano pamupeene nabho.

29 Paapo linga uChaala aabhasala abhandu nu kubhasaya, atakusanusha inyinong’ono shaake.

30 Kubhwandilo umwe mutakamupulikagha uChaala, loole ulu abhapeliile ichisa ku nongwa iya kuti aBhaisilaeli bhatakumupulika umwene.

31 Isa muumwo uChaala akabhapelela ichisa umwe, bhuhhuubhwo aBhaisilaeli bhatakumupulika uChaala ulu, ukuti umwene akabhapelele ichisa bhoope.

32 Ku nongwa iya kuti abhandu bhooshi bhatakumupulika uChaala, ghwepe abhabhiikite ukubha ungati bhapinyighwa ukuti abhapelele ichisa abhandu bhooshi.

[†] 11:26 11:26 *Akaaya aka Siyooni* Kwo kuti, Yelusaleemu, akaaya akeelu aka Chaala. [☆] 11:27 11:26-27 Yesaaya 27:9; 59:20-21; Yelemiia 31:33-34

UChaala apaalighwange

³³ Tesha, ubhukabhi, amahala nu kushaaghania ukwa Chaala muumwo fibheeliile ubhukulu! Kali, ghwini yuuyo abhaghiile ukubhwaghania ubhulongi ubhwa Chaala pamu ukumanya muumwo isila shaake shibheeliile?

³⁴ Ishi shili isa muumwo shisimbiighwe mu Masimbo aMeelu ukuti,
“Kali, ghwini yuuyo ayimeenye inyango iya Malafyale?

Kali, ghwini yuuyo abhaghiile ukumulingaania isha kubhomba?”[☆]

³⁵ “Kali, ghwini yuuyo akamukopela uChaala akandu kamu,
kaako uChaala akulondighwa amuhombe?”[☆]

³⁶ Paapo utundu twoshi tukufuma kukwake, tuliipo ku maka ghaake na ku nongwa yaake. UChaala apaalighwange bhwila na bhwila. Ameni.

12*Mubhombelaghe uChaala mu bhwumi bhwinyu*

¹ Po mwe bhiitiki bhanyiitu, ku nongwa iya kuti uChaala akutupelela ichisa, ingubhasuuma ngaani ukuti mwifumyange kwa Chaala nu kubha ungati fyabhupe fiifyo fyumi, fiifyo fikumuhobhosha uChaala. Bhombagha ulwo, paapo iyo yo yiiyo sila iya nalooli iya kumwipuuta uChaala.

² Manye mweghelelaghe utuyiilo utubhiibhi utwa bhandu abha mu chiisu ichi, loole uChaala ashisanushe inyinong’ono shiinyu ukuti mubhe

bhandu bhapya. Linga mwabhomba ulwo, po mubhaghiile ukushaaghania shiisho uChaala akushilonda nu kushimanya imbombo inyiisa shiisho shikumuhobhoshha umwene.

³ Ku nongwa iya kuti uChaala aambeliile ichisa une ukuti imbe mutumighwa ghwake, ingubhabhuula umwe mweshi ukuti manye mwibhi-ikaghe ukubha bhiisa ukukinda muumwo mukulondighwa ukubha. Loole mwinong'onaghe shiisho sha mahala ukukongana nu lwitiko lula lula luulwo uChaala amupiile ghweshi umundu.

⁴ Isa muumwo mushimanyiile, umubhili ghuli ghumoghwene, loole ghuli nu tumbakaasha utwingi, kooshi akambakaasha kali ni mbombo yaake.

⁵ Bhubhuubhwo, pamupeene nu kuti utwe twe bhangi, poope tuli ungati mubhili ghumoghwene ku sila iya kubha pamupeene nu Kilisiti. Ku sila iyo, ghweshi umundu akumusubhaalila umunine.

⁶ UChaala ku chisa chaake, atupiile ifikungilwa ifya luko nu luko. Umundu ughwa chikungilwa icha bhusololi,* po asololaghe ukukongana na shiisho akwitika ukuti uChaala amubhuulite.

⁷ Umundu ughwa chikungilwa icha kubhabhombela abhanine, abhabhombelaghe ni ndumbula yooshi. Ghwepe ughwa chikungilwa icha kubhamanyisha abhanine, amanyishange.

⁸ Soona ughwa chikungilwa icha kubhakasha abhanine, abhakashange. Ghwepe ughwa

* **12:6 12:6** Bhelenga ishu ilya **Umusololi** ku Mashu aMaheesha.

chikungilwa icha bhupe, iifumyange ni ndumbula yaake yooshi. Umundu ughwa chikungilwa icha bhulongoshi, iikaakilaghe ukulongosha akiisa. Ghwepe ughwa chikungilwa icha kubhapelela ichisa abhanine, abhombaghe ulwo nu lusekelo.

⁹ Bhaghanaghe abhanyiinyu ni ndumbula yooshi chishita kubha bhongubhisania. Manye mubhombaghe shiisho mbiibhi, loole mubhombaghe shiisho nyiisa amashiku ghooshi.

¹⁰ Ghananagha mwibheene-bheene ungati mwe bhanamundu. Ghweshi umundu amughindikaghe umunine ukukinda yuuyo mwene.

¹¹ Manye mubhange bhakata ukubhomba imbombo iya Chaala, loole kongagha shiisho uMbepo ughwa Chaala akulonda ukuti mumubhombelaghe ku maka uMalafyale uYeesu.

¹² Sekelagha ku nongwa iya kubha nu lusubhilo kwa Chaala. Kibhagha indamyo shiisho shikubhaagha, soona endelelagha ukumusuma uChaala.

¹³ Bhaafwange abhiitiki abhanyiinyu utundu tuutwo bhasobheliighwe, soona bhapokeelaghe akiisa abhaheesha mu nyumba shiinyu.

¹⁴ Bhiipuutilaghe abhandu bhaabho bhakubhafulasha ukuti uChaala abhasaye. Manye mubhiipuutilaghe ukuti bhaghunighwe.

¹⁵ Sekelagha pamupeene na bhandu bhaabho bhakusekela, soona lilagha pamupeene na bhandu bhaabho bhakulila.

¹⁶ Ikalagha akiisa nu kufwana mwibheene-bheene. Manye mwifunaghe, loole mwiyiishange nu kwafwana pamupeene na bhandu

abhafuyufu. Manye mwibhonaghe ukubha mwe bha mahala leka ukubhakinda abhanyiinyu.

17 Linga umundu aakubhombela akabhiibhi, manye utaanishange, loole bhombagha shiisho nyiisa pandaashi pa bhandu bhooshi.

18 Ikaakilagha mu sila shooshi ukuti mubhange nu lutengaano na bhandu bhooshi.

19 Mwe bhaghanighwa bhangu, manye mutaanishange, loole mulekelaghe uChaala shooshi. Paapo shisimbiighwe mu Masimbo aMeelu, uMalafyale uChaala akuti, “Ukutaanisha mbombo yangu, neene ingutaanisha.”✧

20 Soona shisimbiighwe mu Masimbo aMeelu ukuti,

“Linga umulughu ghwako akwipulika isala, mupe ifindu,

linga akwipulika inyoota, mung’weshe.

Paapo linga ghwamubhombela umulughu ghwako ulwo,

kubha ungati ghwamutwika ingalashibhwe pa mutu ghwake.”

21 Manye ghwitikishange ukuti ubhubhiibhi bhukupootaghe, loole ubhupootaghe ubhubhiibhi ku sila iya kubhomba inyiisa.

13

Bhapulikaghe abhalongoshi abha silikali

1 Ghweshi umundu akulondighwa abhaghindikaghe nu kubhapulika abhalongoshi abha silikali, paapo amaka ghaabho agha kulongosha ghakufuma kwa Chaala. Soona,

✧ 12:19 12:19 Ngumbusho isha Ndaghilo isha Moose 32:35

umwene ghwe yuuyo abhabhiikite abhalongoshi abho ukuti bhalongoshange.

² Po umundu ghweshi yuuyo akughakaana amaka agha bhalongoshi abho, akumukaana ghwi Chaala yuuyo abhabhiikite. Umundu yuuyo akubhomba ulwo, akwibhiikila ubhulongi bhwake yuuyo mwene.

³ Paapo bhaabho bhakubhomba inyiisa, bhatakubhooghopa abhalongoshi, loole bhala bhaabho bhakubhomba imbiibhi. Po linga utakulonda ukumwoghopa umulongoshi, bhombagha inyiisa, ghwepe indiakupaalaghe.

⁴ Mumanye ukuti umulongoshi ughwa silikali uyo mubhombi ughwa Chaala yuuyo akubhomba imbombo inyiisa ku nongwa iya kubhaafwa umwe. Loole linga ghwabhomba imbiibhi, ghwoghopaghe paapo umwene ali na maka agha kukufunda. Ku sila iya kukufunda ukwo, umulongoshi akulangisha ilyoyo ilya Chaala ku bhandu bhaabho bhakubhomba imbiibhi.

⁵ Iyi yo yiiyo nongwa abhandu bhakulondighwa ukubhaghindika nu kubhapulika abhalongoshi. Manye bhabhombaghe ulwo ku nongwa iya kwoghopa ukufundighwa, loole bhabhombaghe ku nongwa iya kuti bhameenye mu ndumbula shaabho ukuti bhakulondighwa ukubhomba ulwo.

⁶ Soona yo yiiyo nongwa iyi mukuhombagha isongo ku bhalongoshi abho paapo abheene bhabhombi abha Chaala bhaabho bhakwikaakila amashiku ghooshi ukumubhombela umwene ku mbombo yiyiiyo.

⁷ Po bhombagha shila shooshi shiisho

mukulondighwa ukubhomba ku bhalongoshi abho. Linga bhakubhamelela isongo isha luko nu luko, bhahombaghe. Iyiishanga nu kumughindika umundu yuuyo akulondighwa ukughindikighwa.

Tukulondighwa ukughanana twibheene-bheene

⁸ Manye mumelelighwange nu mundu naayumo, loole mumelelighwange ukughanana mwibheene-bheene. Paapo umundu yuuyo amughanite umunine, uyo akubhomba isa muumwo indaghilo shikulondela.

⁹ Paapo indaghilo ishi shikuti, “Manye ushipanaghe, manye ughoghaghe, manye ghwiibhaghe, manye unyonywange utundu utwa munyiinyu”[☆] ni ndaghilo inine shooshi shili mu lulaghilo lumolwene luulwo lukuti, “Mughanaghe umunyiinyu isa muumwo ghwiyiighanite yughweghwe.”[☆]

¹⁰ Umundu yuuyo amughanite umunine, atabhaghiile ukumubhombela akabhiibhi. Po linga umundu abhaghanite abhanine, umundu uyo akubhomba shooshi shiisho indaghilo shikulonda.

¹¹ Mukulondighwa ukubhomba ulwo paapo mumeenye ukuti akabhalilo aka kulamusha kafikite. Tesha! Ishiku liilyo uChaala akuya pakutupoka, lili papiipi ngaani ukukinda akabhalilo kala kaako tukaandagha ukumwitika uMalafyale uYeesu.

[☆] **13:9 13:9** Bhufumilo 20:13-17; Ngumbusho isha Ndaghilo isha Moose 5:17-21 [☆] **13:9 13:9** Bhalaabhi 19:18

¹² Ubhushiku bhuli papiipi ukushila, tulamushe ukufuma mu tulo. Po tushileke imbombo isha mu chiisi, loole tubhombaghe imbombo isha mu bhwelu.

¹³ Tubhange na kayiilo akiisa isa abhandu bhaabho bhakwikala mu bhwelu. Manye tubhange bhapafu, bhoching'welo, bhabhomba imbiibi, bhashipani, bhandu abha bhulwe pamu bhaabho bhali nu lwibhuno.

¹⁴ Loole ulu tumwitikishange uMalafyale uYeesu Kilisiti ukuti atulongoshange mu bhwumi bhwitu. Manye tulongoshighwange soona ni finyonywa ifya bhundu ubhwa mbiibi.

14

Manye mulonganaghe mwibheene-bheene

¹ Mupokeelaghe umwitiki umunyiinyu yuuyo atakalite mu lwitiko, manye mukaanikanaghe naghwe ku nongwa iya kubha pashima naghwe mu nyinong'ono.

² Paapo umundu yumo ukukongana nu lwitiko lwake, akulya kooshi akandu, loole umunine ukukongana nu lwitiko lwake, akulya ibhogha ilya maani lyene.

³ Po umundu yuuyo akulya kooshi akandu, manye amufuuyaghe yula yuuyo akulya ibhogha ilya maani lyene. Ghwepe yuuyo akulya ibhogha ilya maani lyene manye amulongaghe yula yuuyo akulya kooshi akandu, paapo uChaala amwitikite umundu uyo isa muumwo abheeliile.

⁴ Kali, ughwe ghwe ghwini ghwe kumulonga umubhombi ughwa mundu umunine? Paapo umalafyale ghwake ghwe yuuyo ameenye ukuti

umubhombi ghwake aabhomba akiisa pamu ak-abhiibhi. Po umubhombi uyo indiabhombaghe inyiisa paapo uMalafyale ghwe yuuyo ali na maka agha kumupela ukuti abhombaghe ulwo.

⁵ Abhandu bhamu bhakwinong'ona ukuti ishiku limo lili nu bhukulumba ukukinda ishiku inine, loole abhandu abhanine bhakwinong'ona ukuti amashiku ghooshi ghagheliileeshe. Po ghweshi umundu abhombaghe ukukongana na muumwo akwinong'ona ukuti sha nalooli.

⁶ Abhandu bhala bhaabho bhakwinong'ona ukuti ishiku limo lili nu bhukulumba, bhakubhomba ulwo ku nongwa iya kumughindika uChaala. Bhoope abhandu bhala bhaabho bhakulya kooshi akandu, bhakubhomba ulwo ku nongwa iya kumughindika uChaala, paapo bhakumupaalisha uChaala. Bhubhuubhwo bhoope bhala bhaabho bhakulya ibhogha ilya maani lyene, bhakubhomba ulwo ku nongwa iya kumughindika uMalafyale, soona bhoope bhakumupaalisha uChaala.

⁷ Naayumo umundu pakati papiitu yuuyo mwumi ku nongwa yaake mwene, soona naayumo umundu yuuyo akufwa ku nongwa yaake mwene.

⁸ Paapo linga tuli bhuumi, tuli bhuumi ukuti tumubhombelaghe uMalafyale, soona linga tukufwa, tukufwa ku nongwa iya bhukulumba ubhwa Malafyale. Po linga tuli bhuumi pamu tukufwa, utwe twe bhandu bhaake.

⁹ Yo yiiyo nongwa iyi uKilisiti akafwa nu kushuuka ukuti abhe ghwi Malafyale ughwa bhandu bhooshi, abhafwe na bhaabho bhuumi.

10 Kali, kooni ughwe kumulonga umwitiki umunyiinyu? Kali, kooni kumufuuya umwitiki umunyiinyu? Paapo utwe tweshi inditukiime pandaashi pa chitengu icha bhulongi icha Chaala ukuti tulonghwe.

11 Tumeenye ilyo ku nongwa iya kuti shisimbi-ighwe mu Masimbo aMeelu, uMalafyale uChaala akuti,

“Isa muumwo indi mwumi, ghweshi umundu indiakafughamile pandaashi papangu nu kuyugha pabhwelu ukuti une nee Chaala.”[☆]

12 Po ghweshi umundu pakati papiitu indiakalingaanie inongwa shaake yuuyo mwene pandaashi pa Chaala.

Manye ubhabhombelaghe akabhiibhi abhiitiki abhanyiinyu

13 Po manye tulonganaghe twibheene-bheene, soona tuleke ukubhomba shila shiisho shibhaghiile ukumupelela umwitiki umunyiitu ukwikinya nu kubhomba imbiibhi.

14 Ku nongwa iya kubha pamupeene nu Malafyale uYeesu, indi nu bhwanalooli ukuti naafimo ifindu fiifyo finyali. Loole linga umundu yumo akwitika ukuti ifindu fiifyo akulya finyali, po ifindu ifyo fikubha finyali kukwake.

15 Linga ughwe kumupelela ubhuswimaane umwitiki umunyiinyu ku nongwa iya findu fimo fiifyo kulya, utamughanite umwitiki uyo. Po ku

[☆] 14:11 14:11 Yesaaya 45:23

nongwa iya findu fiifyo kulya, manye ukomani-ange ulwitiko ulwa mwitiki umunyiinyu yuuyo uKilisiti akafwa ku nongwa yaake.

16 Po ughwe manye ubhombaghe shiisho kushibhona ukuti nyiisa linga abhandu abhahine bhakushibhona ukuti mbiibhi.

17 Paapo tutakuchaagha ichitangalala icha Chaala* ku sila iya fiifyo tukulya pamu fiifyo tukung'wa, loole ku sila iya kubhomba shiisho shibhaghiile pandaashi papaake, ukubha nu lutengaano nu kubha nu lusekelo. Fyoshi ifyo fikufuma kwa Mbepo uMwelu.

18 Umundu yuuyo akumubhombela uKilisiti ku sila iya kubhomba isho, akumuhobhosha uChaala, soona akubha mubhaghile pandaashi pa bhandu.

19 Po twikaakilaghe akabhalilo kooshi ukubhomba shila shiisho shikutupela ukuti twikalaghe pamupeene na bhiitiki abhanyiitu ku lutengaano, na shiisho shikutwafwa ukukasania twibheene-bheene mu lwitiko.

20 Manye ukomaniange imbombo iya Chaala ku nongwa iya findu. Nalooli, ifindu fyoshi fyitikishiighwe ukulya, loole kataa kiisa ukuti umundu alyange ifindu fiifyo fikumupelela umunine ukwikinya nu kubhomba imbiibhi.

21 Kiisa ukuleka ukulya ifindu pamu ukung'wa indifaayi,† pamu ukubhomba akandu kaako kabhaghiile ukumupelela umwitiki umunyiinyu ukwikinya nu kubhomba imbiibhi.

* 14:17 14:17 Bhelenga ishu ilya *Ichitangalala icha Chaala* ku Mashu aMaheesha. † 14:21 14:21 Bhelenga ishu ilya *Indifaayi* ku Mashu aMaheesha.

²² Po linga kushiitika shooshi isho, shibhange shaako ughwe pamupeene nu Chaala. Musayighwa umundu yuuyo indumbula yaake yitakumulonga bhwo akubhomba shiisho akushibhona ukuti sha nalooli.

²³ Loole umundu yuuyo akwilaamwa mu ndumbula yaake ku findu fiifyo akulya, uChaala akumulonga umundu uyo paapo atakubhomba isa muumwo akwitikila. Po linga umundu akubhomba akandu kooshi kala chishita lwitiko, akubhomba imbiibhi.

15

Manye twihobhoshange yutwetweshe

¹ Po utwe twe tukalite mu lwitiko, tukulondighwa ukuti tubhaafwange bhaabho bhatakalite mu lwitiko. Manye twihobhoshange yutwetweshe.

² Ghweshi umundu pakati papiitu akulondighwa amubhombelaghe umwitiki umunine shiisho nyiisa ukuti akalaghe mu lwitiko.

³ Paapo uKilisiti ghwepe atakabhombagha shiisho shikamuhobhoshanga mweneeshe, loole akabhombagha isa muumwo shisimbiighwe mu Masimbo aMeelu ukuti, “Amaheelu ghaagho bhakukutukagha ughwe Chaala, ulu ghiisa kukwangu.”☆

⁴ Paapo shooshi shiisho shikasimbighwa kubhwandilo mu Masimbo aMeelu, shikasimbighwa ku nongwa iya kutumanyisha utwe ukuti twendelelaghe ukubha nu lusuubhilo. AMasimbo

☆ 15:3 15:3 Sabhuli 69:9

agho gho ghaagho ghatusubhaasha nu kutwafwa ukukibha indamyo.

⁵ Po ingubhiipuutila kwa Chaala yuuyo akutukasha nu kutupa ulusuubhilo ukuti abhaafwe ukwikala pamupeene ukukongana ni chifwanikisho icha Kilisiti uYeesu.

⁶ Linga mukubhomba ulwo, mweshi pamupeene indimumupaalaghe uChaala yuuyo ghwi Ghwise ughwa Malafyale ghwitu uYeesu Kilisiti.

UChaala akubhapokeela na bhaabho bhataa Bhayuuta

⁷ Pokeelanagha mwibheene-bheene isa muumwo uKilisiti akabhapokeela umwe ukuti uChaala apaalighwange.

⁸ Mumanye ukuti uKilisiti akiisa pa chiisu ichi pakubhabhombela inyiisa aBhayuuta ukuti alangishe ubhusubhaalilighwa ubhwa Chaala isa muumwo akafinga ku bhosekulu bhaabho.

⁹ Soona akiisa ukuti abhandu bhaabho bhataa Bhayuuta bhamupaalaghe uChaala ku nongwa iya chisa chaake isa muumwo shisimbiighwe mu Masimbo aMeelu ukuti,

“Po indiingupaalaghe pakati pa bhandu abha fyisu ifinine.

Indiniimbaghe imbaalo isha ngamu yaako.”✧

¹⁰ Soona shisimbiighwe ukuti,

“Mwe bhandu abha fyisu ifinine,
sekelegha pamupeene na bhandu abha Chaala.”✧

✧ 15:9 15:9 2 Samweli 22:50; Sabhuli 18:49 ✧ 15:10 15:10
Ngumbusho isha Ndaghilo isha Moose 32:43

11 Soona shisimbiighwe mu Masimbo aMeelu ukuti,

“Mwe bhandu abha fyisu ifinine, mupaalaghe uMalafyale uChaala.

Mwe bhandu abha fikolo fyoshi, mupaalaghe uChaala.”✧

12 Soona, ghwepe umusololi uYesaaya akasimba mu Masimbo aMeelu ukuti,

“Indiakiiise umundu yumo ukufuma mu mbaapo iya Yeese,

indiakabhalongoshange abhandu bhooshi abha fyisu ifinine,

bhoope indibhakamusubhaalilaghe.”✧

13 Po ingubhiipuutila kwa Chaala yuuyo tukumusubhaalilagha ukuti abhapange ulutengaano nu lusekelo bhwo mukwendelela ukumwitika. Apo po paapo indimwendelelaghe ukubha nu lusuubhilo kukwake ku sila iya maka agha Mbepo uMwelu.

Inyango iya Paabhuli iya kusimba ukalata uyu

14 Mwe bhiitiki bhanyiitu, une yuneene imeenye nalooli ukuti umwe mwe bhandu bhiisa, mushimeenye nalooli shooshi shiisho mukulondighwa ukubhomba, soona mubhaghiile ukumanyisania mwibheene-bheene,

15 loole naabhasimbila amashu ghamu mwa kalata uyu chishita kwoghopa ukuti imbakumbushe soona imbombo isho. Naabhomba ulwo ku nongwa iya chisa chiicho uChaala aambiile,

¹⁶ ukuti imbe mubhombi ughwa Kilisiti uYeesu ku bhandu bhaabho bhataa Bhayuuta. Ingubhomba imbombo iya kulumbilila iNongwa iNyiisa isha Chaala ku bhandu bhaabho bhataa Bhayuuta. Une indi isa umupuuti yuuyo akubhafumya abhandu abho kwa Chaala ungati fyabhufe fiifyo umwene afyitikite, soona fiifyo uMbepo uMwelu afisukite.

¹⁷ Ku nongwa iya kuti indi pamupeene nu Kilisiti uYeesu, ingwifuna paapo ingumubhombela uChaala.

¹⁸ Une indabhaghiile ukushiyugha inine, loole shila sheene shiisho uKilisiti akashibhomba ukughendela kukwangu. Umwene akabhalongosha abhandu bhaabho bhataa Bhayuuta ukuti bhamupulikaghe uChaala ku shiisho ingayughagha nu kubhomba.

¹⁹ Bhakiitika ku nongwa iya kuti bhakafibhona ifyika ni fiswigho fiifyo ingabhombagha ku maka agha Mbepo uMwelu. Ku nongwa iyo, ingabhuuka pakulumbilila iNongwa iNyiisa iya Kilisiti ukwandila mu kaaya aka Yelusaleemu ukufika mu chiisu icha Ililiko.

²⁰ Inyango yangu akabhalilo kooshi ya kulumbilila iNongwa iNyiisa pooshi pala paapo ingamu iya Kilisiti yitamanyikitwe. Ingabhomba ulwo ukuti manye neendelelaghe ukusenga pamwanya pa lwalilo ulwa mundu umunine,*

²¹ loole imbombaghe isa muumwo shisimbi-ighwe mu Masimbo aMeelu ukuti,

* **15:20 15:20 Ukusenga pamwanya pa lwalilo ulwa mundu umunine** Kwo kuti, ukubhomba imbombo yiyo umundu umunine akaanda ukuyibhomba.

“Abhandu bhaabho bhatalumbililiighwe
inongwa shaake, indibhakashiteshe,
na bhandu bhaabho bhatapulikite naalumo,
indibhakashaaghanie.”✧

²² Imbombo iyo yiiyo naabhombagha, yo yiiyo
yaambeliile ukuti akabhalilo akingi imbootwe
ukwisa kukwinyu.

²³ Loole ku nongwa iya kuti naamala imbombo
yangu kuno, nu kuti ingunyonywa ku fyinja
ifyingi ukwisa kukwinyu,

²⁴ po imbaatikite ukughendela kukwinyu nu
kutuusha akabhalilo akapimba bhwo inguchu-
ula ukubhuuka ku chiisu icha Isipaniya. In-
gusubhaalila ukukomaana numwe ukuti ihob-
hoke pamupeene numwe nu kuti muunyaafwe
utundu utwa kuunyaafwa mu sila yangu.

²⁵ Loole ulu ingubhuuka ku kaaya aka
Yelusaleemu pakubhabhombela abhiitiki
bhaabho bhali ukwo.

²⁶ Paapo abhiitiki abha mu chiisu icha Mak-
endooniya na bha mu chiisu icha Akaya bhi-
ifumyishe utundu tumo ukuti bhabhaafwe ab-
hapiina mu bhiitiki bhaabho bhali mu kaaya aka
Yelusaleemu.

²⁷ Abheene bhakahobhoka ukubhomba ulwo
paapo bhakamanya ukuti mbombo yaabho
ukubhabhombela abhanine. Paapo linga ab-
handu bhaabho bhataa Bhayuuta bhapokeelite
isayo isha Mbepo uMwelu ukufuma ku Bhayu-
uta, bhoope bhakulondighwa ukubhaafwa aB-
hayuuta utundu tuutwo bhakulonda.

²⁸ Po linga naamala imbombo iyo nu kubha nu bhwanalooli ukuti bhaapokeela, indiingaghen-dele kukwinyu bhwo ingubhuuka ku chiisu icha Isipaniya.

²⁹ Imeenye ukuti linga niisa kukwinyu, uKilisiti indiakatusaye ngaani akabhalilo kaako indiingikale pamupeene nuumwe.

³⁰ Mwe bhiitiki bhanyiitu, ku nongwa iya kuti tukumwitika uMalafyale ghwituu uYeesu Kilisiti na ku nongwa iya lughano luulwo uMbepo uMwelu akutupa, ingubhasuuma ukuti mwikaakilaghe ukubha pamupeene nuune uku-uniyuutila kwa Chaala.

³¹ Muuniyuutilaghe ukuti uChaala aamboke ku bhandu abha mu chiisu icha Yuteeya bhaabho bhatakumwitika uKilisiti, ukuti manye bhaambombele akabhiibhi. Soona muuniyuutilaghe ukuti abhiitiki abha mu kaaya aka Yelusaleemu bhiitike ukupokeela utundu tuutwo inguya pakubhapa.

³² Po linga uChaala iighana, indiingiise kukwinyu bhwo indi nu lusekelo mu ndumbula yangu nu kubha na kabhalilo akiisa aka kutu-usha pamupeene nuumwe.

³³ Ingusuuma kwa Chaala yuuyo akutupa ulutengaano ukuti abhange pamupeene nuumwe mweshi. Ameni.

16

UPaabhuli akubhalamuka abhandu abha ku Looma

¹ Ingulonda mumanye ukuti uFoyibhe mwitiki munyiitu, soona mukolo yuuyo

akubhabhombela abhiitiki bhaabho bhali mu kaaya aka Kenikeleya.

² Ingubhasuuma mumupokeele akiisa isa muumwo abhiitiki bhakulondighwa ukubhomba. Soona mwafwange akandu kooshi kaako akulonda paapo ghwepe akabhaafwanga leka abhandu abhingi pamupeene nuune.

³ Muundamukile uPuliisika pamupeene nu mulume uAakila. Abhandu abho bhabhombi bhanyiitu mu mbombo iya Kilisiti uYeesu.

⁴ Soona bhakiifumya nalinga kufwa ku nongwa iya kubhupoka ubhwumi bhwangu. Ingubhapaalisha leka abhandu abho. Indaa neene nimwene nee ingubhapaalisha, loole na bhandu bhooshi bhaabho bhataa Bhayuuta abha mu fipanga fyoshi bhoope bhakubhapaalisha leka.

⁵ Soona ingubhalamuka na bhiitiki abha mu chipanga bhaabho bhakubhungaanagha mu nyumba iya Aakila nu Puliisika. Muundamukile umumanyani ghwangu uEpaneeto yuuyo ak-abha ghwa kwanda ukumwitika uKilisiti ku chiisu icha Aasiya.

⁶ Muundamukile uMaliya yuuyo aabhombite imbombo ku maka ku nongwa iya kubhaafwa umwe.

⁷ Muundamukile uNduloniko nu mukashi uYuniiya, aBhayuuta abhanyiitu bhaabho bhakapinyighwa pamupeene nuune. Abhandu abho bhamanyikitwe leka pakati pa bhatumighwa, soona bhakatanga ukumwitika uKilisiti bhwo une ingaali.

⁸ Muundamukile uAmupuliyaato umughanighwa ghwangu soona mwitiki ughwa

Malafyale uYeesu.

⁹ Muundamukile uLibhano yuuyo mubhombi munyiitu mu mbombo iya Kilisiti. Soona muundamukile umughanighwa ghwangu uSitaakisi.

¹⁰ Muundamukile uApeepe, yuuyo akashaagha ingelo inyingi ku nongwa iya Kilisiti. Soona muundamukile na bhandu bhooshi bhaabho bhakwikala mu nyumba iya Alisitobhulo.

¹¹ Muundamukile uHelootiyooni uMuyuuta umunyiitu na bhandu bhooshi bhaabho bhakwikala mu nyumba iya Naalikiiso bhaabho bhamwitikite uMalafyale uYeesu.

¹² Muundamukile uTilifayina nu Tilifoosa, abhakolo bhaabho bhakubhomba ku maka imbombo iya Malafyale uYeesu. Soona muundamukile umughanighwa ghwangu uPeelisisi, umukolo yuuyo akiikaakilagha leka ukumubhombela uMalafyale uYeesu.

¹³ Muundamukile uLuufu yuuyo uMalafyale akamusala ukubhomba imbombo yaake. Muundamukile nu ng'ina yuuyo aanyaafwishe une ungati indi mwana ghwake.

¹⁴ Muundamukile uAsinikilito, uFuleghooni, uHelime, uPaatilobha, uHelima na bhiitiki abhaine bhooshi bhaabho bhali pamupeene nabho.

¹⁵ Muundamukile uFilologho nu mukashi uYuliiya. Soona muundamukile uNeleeya nu mulumbu ghwake pamupeene nu Olimupa na bhiitiki bhooshi bhaabho bhali pamupeene nabho.

¹⁶ Lamukanagha mwibheene-bheene ni ndumbula inyeelu ku sila iya kwofwana. Soona, abhiitiki abha mu fipanga fyoshi ifya Kilisiti ifya

kuno, bhakubhalamuka.

Isoki isha bhumalilo isha Paabhuli

¹⁷ Mwe bhiitiki bhanyiitu, ingubhasuuma ukuti mubhange maaso ngaani nu kwiyeepusha na bhandu bhaabho bhakupela ukuti abhiitiki bhayabhanikaghe mu fibhughutila, na bhaabho bhakumanyishanga shiisho shili pashima na shiisho umwe mumanyiile.

¹⁸ Abhandu isa abho bhatakumubhombela uKilisiti uMalafyale ghwitu, loole bhakwibhombela bhaabho bheene ku nongwa iya finyonywa fyabho ifibhiibhi. Ku sila iya kuyugha akiisa nu kupyeelesha, bhakushishimbula indumbula isha bhandu bhaabho bhatakalite mu lwitiko.

¹⁹ Une inguhobhoka leka paapo ghweshi umundu apulikite muumwo mukukonga akiisa ish uilya Chaala. Loole mubhange bha mahala ukuti mushimanyaghe shiisho nyiisa, soona mwiyeepushange ni mbiibhi.

²⁰ Po uChaala ughwa lutengaano indiamutisani uSeetano* nu kumubhiika paase pa tulundi twinyu. Ingusuuma ukuti ichisa icha Malafyale ghwitu uYeesu Kilisiti chibhange nu umwe mweshi. [Ameni.]

²¹ UTiimoti yuuyo mubhombi munyiitu akubhahalamuka mweshi. Soona, aBhayuuta abhanyiitu uLukiiyo, uYaasoni nu Sosipateeli bhoope bhakubhahalamuka.

* **16:20 16:20** Bhelenga ingamu iya **USeetano** ku Mashu aMaheesha.

²² Nuune ni Telitiyo nee ingasimbagha shiisho uPaabhuli akaambuulagha, ingubhalamuka un-gati mwitiki munyiinyu ughwa Malafyale uYeesu Kilisiti.

²³ UGhaayo yuuyo ingwikala mu nyumba yaake na yuuyo ichipanga chikukomaanagha mu nyumba yaake, akubhalamuka. UElaasito yuuyo akusengulagha indalama isha kaaya aka Kolinti nu mwitiki umunyiitu uKwalito, bhakubhalamuka. [

²⁴ Ingusuuma ukuti ichisa icha Malafyale gh-witu uYeesu Kilisiti chibhange numwe mweshi. Ameni.]

UPaabhuli akumupaalisha uChaala

²⁵ Apaalighwange uChaala! Umwene ali na maka agha kubhakasha ukuti mukale mu lwitiko lwinyu ukughendela ku Nongwa iNyiisa iya Yeesu Kilisiti yiiyo ingalumbililagha kukwinyu. Inongwa iyo yo yiiyo uChaala atakayibhiika pabhwelu ukufuma kubhwandilo.

²⁶ Loole ulu amasimbo agha bhasololi ghay-ibhiikite pabhwelu inongwa iyo ku bhandu bhooshi. UChaala ughwa bhwila na bhwila ghwe yuuyo akalaghila ukuti abhandu bhooshi bhab-humaneye ubhwanalooli ubhwo ukuti abhandu abho bhamwitikaghe nu kumupulika.

²⁷ UChaala mwene ughwa mahala ghooshi ghwe yuuyo apaalighwange ku sila iya Yeesu Kilisiti bhwila na bhwila. Ameni.

lxxiii

Ndali

Ndali: ULwitikano uLupya (New Testament+)

copyright © 2020 Wycliffe Bible Translators, Inc.

Language: Ndali

Contributor: SIL International (in Africa)

All rights reserved.

2025-05-16

PDF generated using Haiola and XeLaTeX on 16 May 2025 from source files dated 16 May 2025

0c64549c-02c3-5ec7-a6a9-89d039705d73